

庫文有萬


種千一集一第

編主五雲王

鑑寶繪圖

著彥文夏

行發館書印務商



鑑 寶 繪 圖

著 彥 文 夏

書 基 本 學 國

編主五雲王  
庫文有萬  
種千一集一第  
鑑寶繪圖  
著彥文夏

路山寶海上  
館書印務商

者刷印兼行發

埠各及海上  
館書印務商

所行發

版初月十年九十年華中

---

The Complete Library  
Edited by  
Y. W. WONG

---

T'U HUI PAO CHIEN

By

HSIA WEN YEN

THE COMMERCIAL PRESS, LTD.

Shanghai, China

1930

# 楊序

雲間義門夏氏士良集歷代能畫姓名由史皇封膜而下訖于有元凡若干人釐爲五卷題曰圖繪寶鑑介其友天台陶君九成持其編謂余曰鄧椿有言其爲人也多文雖有不曉畫者寡矣其爲人也無文雖有曉畫者寡矣先生名能文賜一言標其端余曰書盛於晉畫盛於唐宋書與畫一耳士大夫工畫者必工書其畫法卽書法所在然則畫豈可以庸妄人得之乎宣和中建五岳觀大集天下畫史如進士科下題掄選應詔者至數百人然多不稱上旨則知畫之積習雖有譜格而神妙之品出於天質者殆不可以譜格而得也故畫品優劣關於人品之高下無論侯王貴戚軒冕山林道釋女婦苟有天質超凡入聖卽可冠當代而名後世矣其不然者或事模擬雖入譜格而自家所得於心傳意領者則蔑矣故論畫之高下者有傳形有傳神傳神者氣韻生動是也如畫貓者張壁而絕鼠大士者渡海而滅風翊聖真武者叩之而響應寫人真者卽能得其精神若此者豈非氣韻生動機奪造化者乎吾顧未知寶鑑中事模擬而得名士良亦能辨之否乎雖然梁武作歷代畫評米芾作續評非神識高者不能士良好古嗜學風情高簡自其先公愛閒處士以來家藏諸書名畫爲最多朝披夕覽有得於中且精繪事是編之作足以知其品藻者矣祝廩米第未足多讓也是爲序士良名文彥其先爲吳興人云會稽抱遺老人楊維禎在雲間

# 自序

余性鄙僻六藝之外他無所好獨嘗嗜畫遇所適輒終日諳玩殆忘寢食然猶病其不博稍取歷代畫史考論其世與夫得失優劣之差以廣未至而卷帙浩繁不能徧舉欲輯爲一書未暇也自卜居泗上人事稀闊間以宣和畫譜附之他書益以南渡遼金國朝人品刊其叢脞補其闕略彙而成編分爲五卷名曰圖繪寶鑑顧所摭雖詳而尙慮遺者不少益其未備竭其精誠俾千載之下莫逃乎賞鑑豈無博雅君子與我同志者歟至正乙巳秋七月甲子吳興夏文彥士良書於寶墨齋

# 續編滕序

繪畫之事其來尚矣。曰寶鑑者則元夏文彥氏所著也。蓋畫始盛於唐大盛於宋雖胡元之世亦多有其人焉。其在唐時則有若張彥遠氏著歷代名畫記自軒轅至會昌凡三百七十餘人其在宋時則有若郭若虛著圖畫見聞志自會昌至熙寧凡二百七十四人有若鄧椿著畫繼則自熙寧至乾道凡百一十九人有若陳德輝著續畫記則自高宗訖宋終凡百五十人其在勝國時有若湯垕之畫鑑而實大備於寶鑑蓋裒集諸志記見聞而成編故自軒轅以至宋又自宋以至元凡一千五百餘人嗚呼可謂勤矣然夷考文彥則博雅多識精於畫藝又世藏名跡玩索有得非徒知而好之者也肆國朝承平百五十年才藝之士四方輩出顧未有嗣志記以追配古作者豈非遺乎錦衣苗公益之嗜古好文富藏名蹟慨寶鑑之外落痛今賢之亡傳乃取自國初以至今日能畫者若干人彙爲一卷以續夏氏之編爰命工重刊總爲六卷嗚呼其盛心哉編既成乃假予敍之余鄙陋非知畫者竊好焉間求所謂寶鑑考之則皆漫滅不可讀恨矣乃今獲覩巽齋公盛舉豈非一大快哉舉殘墜躋時哲尙友論世於斯在矣可以一藝小之耶苗公名增字益之泌陽縣人今官錦衣衛都指揮巽齋其別號云賜進士出身奉直大夫司經局太子洗馬兼翰林院編修經筵講官同修國史建安滕霄書

# 續編自序

賓山吳子仁手錄時人能畫者十數謁予告曰錦衣苗公巽齋雅好圖畫以元人夏士良圖繪寶鑑考其收積之真贗厭其舊本模糊命麒繕寫重刊及纂當代名士以繼夏氏之編奈麒因京闈考士召書試錄所占望先生代麒彙次以爲續纂予一時應之深愧素無賞鑑恐負賓山之托遂以平日所聞所見及家藏之圖摭拾以應復謀諸社友錦衣王春泉益其知見者統書之皆馳聲於士林者不敢妄分優劣以爲取舍恐得罪於世大抵書之者略能記其出處姓名至若有號有字而不詳其出處姓名者如雪谷及東川居士之竹西園逸史之草蟲松雪之人物巖東之魚東山一菴之山水雖皆清麗出人意表不敢列於集中又若朽菴與賓山皆有水墨山水小景予皆收之其筆力之佳由其善書故也噫國家重熙累洽於茲百五十年餘矣公卿名士山林道釋所作之畫名當時而傳後世者不知幾多予之膚見不過如此尙賴後之君子幸爲正其敍列增其遺略以成巽齋之美焉正德己卯中秋日欽天監副玉泉韓昂識

# 圖繪寶鑑

## 總目

### 卷一

六法三品

三病

六要

六長

製作楷模

古今優劣

粉本

賞鑒

裝褫書畫定式

敍歷代能畫人名

### 卷二

吳

晉

宋

梁

陳

七

### 卷三

隋

唐

五代

三二

宋

晉

宋

梁

陳

六八

### 卷四

宋南渡後

金

宋

梁

陳

九六

### 卷五

元

外國

宋

梁

陳

九六

### 補遺

圖繪寶鑑

總目

一一一

一一〇

圖繪寶鑑 總目

二

唐

元 後魏

遼 梁

宋 齊

續編

明

續補  
五代

宋

金

一一八

# 圖繪寶鑑

## 卷一

### 六法三品

謝恭云。畫有六法。一曰氣韻生動。二曰骨法用筆。三曰應物寫形。四曰隨類傅彩。五曰經營位置。六曰傳模移寫。六法精論。萬古不移。自骨法用筆以下五法可學而能。如其氣韻必在生知。固不可以巧密得。復不可以歲月到。默契神會。不知然而然也。故氣韻生動出於天成。人莫窺其巧者。謂之神品。筆墨超絕。傅染得宜。意趣有餘者。謂之妙品。得其形似而不失規矩者。謂之能品。

### 三病

畫有三病。皆繫用筆。一曰板。二曰刻。三曰結。板者腕弱筆癡。全虧取與物狀平褊。不能圓混也。刻者運筆中疑。心手相戾。勾畫之際。妄生圭角也。結者欲行不行。當散不散。似物凝礙。不能流暢也。

### 六要

氣韻兼力一也。格制俱老二也。變異合理三也。彩繪有澤四也。去來自然五也。師學捨短六也。

### 六長

麗齒求筆一也。僻澀求才二也。細巧求力三也。狂怪求理四也。無墨求染五也。平畫求長六也。

### 製作楷模

釋像有善巧苗本作功方便之顏道流具脩真度世之範帝王崇天日龍鳳之表外夷有慕華欽順之情儒賢見忠信禮義之風武士多勇悍英烈之貌隱逸識高世之節貴戚尙侈靡之容天帝明威福嚴重之儀鬼神作醜醜原注尺者切馳趨原注于鬼切之狀仕女宜秀色嬾原注烏果切婧原注奴坐切之態田家有醇甿朴野之真畫衣紋林石用筆全類於書衣紋有重大而調暢者有緻細而勁健者勾綽縱掣理無妄下以狀高側深斜卷摺飄舉之勢林木有樸枝挺幹屈節皴皮紐裂多端分敷萬狀山石多作礬頭亦爲稜面要見幽遠而氣雄崢嶸而秀潤畜獸須備筋力精神毛骨隱起魚龍求游泳之妙升降之宜觀畫水湯湯若動使人有浩然江湖之思屋木折算無虧筆墨均壯深遠透空花竹有四時景候陰陽向背筍條老嫩苞萼後先自然豔麗閒雅園蔬野草咸有出土體性禽鳥尙毛羽翔舉飛集之形知此雖不能盡鑒閱之精妙然工拙亦略可見矣或有逸品皆高人勝士寄興寓意者當求之筆墨之外方爲得法

古今優劣

佛道人物士女牛馬近不及古山水林石花竹禽魚古不及近何以明之且顧愷之陸探微張僧繇吳道元及閻立德立本皆純重雅正性出天然吳生之作爲萬世法號曰畫聖張萱周昉韓幹戴嵩氣韻骨法皆出意表後之學者終莫能到故曰近不及古至如李成關仝范寬董源之迹徐熙黃筌居宋之蹤前不藉師資後無復繼踵借使二李三王之輩復起邊鸞陳庶之倫再生亦將何以措手於其間哉故曰古不及近

古入畫墓謂之粉本前輩多寶蓄之蓋其草草不經意處有自然之妙宣和紹興所藏粉本多有神妙者賞鑒

看畫如看美人其風神骨相有肌體之外者今人看古蹟必先求形似次及傳染次及事實殊非賞鑒之法也米元章謂好事家與賞鑒家自是兩等家多資明別本作齊力貪名好勝遇物收置不過聽聲此爲好事若賞鑒則天資高明多閱傳錄或自能畫或深畫意每得一圖終日寶玩如對古人雖聲色之奉不能奪也看畫之法不可一途而取古人命意立迹各有其道豈拘以所見繩律古人之意哉鑑下不可看畫醉餘酒邊亦不可看畫卷舒不得其法最爲害物

唐人五代絹素施厚宋絹輕細望而可別唐宋也

古人畫黑色俱入絹縷精神迥出僞者雖極力仿倣而粉墨皆浮於縹素之上神氣亦索然蓋古人筆法圓熟用意精到初若率易愈玩愈佳今人雖極工緻一覽而意盡矣御題畫真僞相雜往往有當時名手臨摹之作故祕府所藏臨摹本皆題爲真邇惟明昌所題最多具眼者自能別識也

### 裝褫書畫定式

大整幅上引首三寸下引首二寸

小全幅上引首二寸七分下引首一寸九分經帶四分上標除打攜竹外淨一尺六寸五分下標除上軸外淨七寸

一幅半上引首三寸六分下引首二寸六分經帶八分。

雙幅上引首四寸下引首二寸七分上標除打攢竹外淨一尺六寸八分下標除上軸桿外淨七寸三分兩幅半上引首四寸二分下引首二寸九分經帶一寸二分

三幅上引首四寸四分下引首三寸一分經帶一寸三分

四幅上引首四寸八分下引首三寸三分經帶一寸五分

橫卷標合長一尺三寸高者用全幅引首闊四寸五分原注高者五寸

古畫不脫不須背標蓋人物精神髮彩花之穠豔蜂蝶只在約略濃淡之間一經背多或失之也故紹興裝褫古畫不許重洗亦不許裁剪過多

古厚紙不得揭薄若紙去其半則書畫精神一如摹本矣

檀香辟濕氣畫必用檀軸有益開匣有香而無糊氣又辟蠹也

敍歷代能畫人名

軒轅時

史皇

周

封膜

齊

敬君

秦

裂裔

前漢

毛延壽

陳敞

後漢

趙岐

劉褒

魏

曹髦

楊脩

吳

吳王趙夫人

蜀

諸葛亮子瞻

晉

明帝

荀勗

嵇康

曹龍

丁遠

楊惠

王羲之

王獻之

康忻

溫嶠

謝岩

夏侯瞻

桓範

徐邈

蔡邕

張衡

劉旦

楊魯

龔寬

陽望

樊育

徐邈

楊魯

戴逵

戴逵子勃

戴逵子顥

夏侯瞻

宋

顧寶光

宗炳

王微

謝莊

袁倩倩子質史敬文

史藝

劉斌

尹長生

顧駿

康允之

顧景秀

吳暕

張則

劉胤祖弟紹祖子璞

蔡斌

漢萬年弟道興

史粲

宋僧辯

褚靈石

范惟質

南齊

宗測

劉係宗

姚曇度子釋惠燒

蘧道愍甥沙門僧珍章繼伯

范懷珍

鍾宗之

王奴

王殿

戴蜀

陳公恩

陶景真

張季和

沈標

謝恭

沈粲

丁光

周曇研

謝惠連

謝約

虞堅

丁寬

劉瑱

毛惠遠弟惠秀子稜

梁

元帝子方等蕭大連

蕭賁

陸杲

陶弘景袁昂

焦寶願

嵇寶鈞

聶松

解倩

陸整

江僧寶

僧威公

僧吉底俱

僧摩羅菩提僧迦佛陀

後魏

蔣少遊

郭善明

侯文和

柳儉

閔文和郭道興

楊乞德

王由

祖班苗本作班

北齊

高孝珩

蕭放

楊子華

田僧亮

劉殺鬼曹仲達

殷英童

高尚士

徐德祖

曹仲璞

後周

馮提伽

隋

閻毗

解悰

唐

何稠

程瓚

僧曇摩掘人

劉龍弟袁楊契丹

劉烏

陳善見

江志

李雅

王仲舒

閻思光

楊須跋

趙武端

范龍樹

周烏孫

楊德紹

竇弘果

毛婆羅

孫仁貴

金忠義

竺元標

蔡金剛

毛嵩

姚彥山

程遜

董好子

楊樹兒

耿純

任貞亮

暢整

李相國

陳慤

劉智敏

史晟

何君墨

京元成

崔霞

冷元琇

馬光業

李蠻子

馬樹鷹

祝丘

潘細衣

周子敬

段去惑

杜景祥

王允之

崔陽元

李旻

張惟亘

李滔

張通

嚴杲

耿昌弟昌期

楊德本

貝俊

李韶

魏晉孫

劉之章

右歷代能畫人名姓而跡罕傳於世故不詳載見張彥遠名畫記

卷二

吳

曹弗興吳興人以畫名冠絕一時孫權命畫屏誤墨成蠅狀權疑其真以手彈之時吳有八絕弗興預一焉又嘗見溪中赤龍寫以獻孫皓至宋文帝旱嘆苗本作嘆取弗興龍置水傍應時雨足且南齊去宋

未遠而謝恭謂弗興之跡殆不復見祕閣之內獨有所畫龍頭又况後南齊數百歲耶嘗畫兵符圖極工然不見諸傳記者豈非一時秘而不出故得以傳遠不坐豐狐文豹之厄也

晉

衛協以畫名於時作道釋人物冠絕當代世以協爲畫聖顧愷之以丹青自名獨慎許可亦謂七佛與烈女圖偉而有情勢毛詩北風圖巧密於情思而自以所畫爲不及

顧愷之字長康小字虎頭晉陵無錫人義熙中爲散騎常侍愷之博學有才氣丹青亦造其妙筆法如春蠶吐絲初見甚平易且形似時或有失細視之六法兼備傅染以濃色微加點綴不求暈飾故俗傳謂之三絕畫絕癡絕才絕方時爲謝安知名以謂自生民以來未之有也世以謂愷之天材挺出獨立無偶妙造精微雖荀衛曹張未足以方駕也

史道碩不知何許人兄弟四人皆以善畫得名而道碩尤工人馬及鵝等初與王徽並師荀勗衛協伎能上下二人優劣未判而謝恭謂王得其意史得其似若是則微之所得者神碩之所寫者形耳意與神超乎丹青之表形與似未離乎筆墨蹊逕宜用此辨之

謝雉陳郡陽夏人也初爲晉司徒主簿入宋爲寧朔將軍善畫多爲賢母孝子節婦烈女之圖有補於風教雖趣筆和墨不無意也

陸探微吳人善畫事明帝人謂畫有六法探微得法爲備平生多愛圖古聖賢像二子綏洪綏肅作畫亦

宋

工惜不見傳。唐張彥遠謂體運逾舉，風力頓挫，一點一拂，動筆新奇，固自不凡矣。

梁

張僧繇。吳人。天監中。歷官至右將軍。吳興太守。以丹青馳譽於時。世謂僧繇畫骨氣奇偉。規模宏逸。而六法精備。當與顧陸並馳爭先。僧繇畫釋氏爲多。蓋武帝時崇尚釋氏。故僧繇之畫往往從一時之好。

陳

顧野王。字希馮。吳郡人。七歲讀五經。九歲能屬文。善圖畫。嘗畫古賢王褒書贊。時稱二絕。尤工畫草蟲。官至黃門侍郎。

隋

展子虔。歷北齊周至隋。爲朝散大夫。而所畫臺閣。雖一時如董展。不得以窺其妙。寫江山遠近之勢尤工。故咫尺有千里趣。

董展。字伯仁。汝南人。以才藝稱鄉里。號爲智海。官至光祿大夫。殿內將軍。尤長於畫。雖無祖述。不愧前賢。夙德名流。見者失色。與展子虔齊名。曾作道經變相。爲時所稱。自非畫外有情。參靈酌妙。入華胥之夢。與化人同遊。何以臻此。

鄭法士。不知何許人。在周爲大都督員外侍郎。建中將軍。入隋授中散大夫。畫師僧繇。尤長於人物。論者謂江左自僧繇以降。法士獨步焉。弟法輪。子德文。孫尚子。皆傳家學。尚子。睦州建德尉。尤工鬼神。又善爲顫筆。見於衣服手足木葉川流者。皆勢若顫動。

唐

閻立德歷官工部尚書。父毗在隋以丹青得名。與弟立本家學俱造其妙。

閻立本總章元年以司平太常伯拜右相。有文學尤善應務。與兄立德以善畫齊名。嘗寫秦府十八學士凌烟閣功臣等。悉皆輝映前古。時人咸稱其妙。

張孝師爲驃騎尉。善畫。嘗死而後生。故畫地獄相爲尤工。吳道玄見之。因效爲地獄變相。

范長壽不知何許人也。學張僧繇畫。然能知風俗好尚。作田家景候人物。皆極其情。至於山川形勢。屈曲向背。分布遠近。各有條理。人謂可以企及。僧繇也。當時得名甚著。官止司徒。苗本作人校尉。

何長壽與范長壽同師法。故苗本作固。所畫多相類。然一原而異派。論者次之。

尉遲乙僧。吐火羅人。貞觀初。其國以善畫薦中都。授宿衛官。封郡公。其父跋質那。時人呼爲大尉遲。乙僧爲小尉遲。父子皆擅丹青。其用筆之妙。遂與閻立本爲之上下也。

吳道玄。字道子。陽翟人。舊名道子。少貧游洛陽。學書於張顚賀知章。不成。因工畫。深造妙處。若悟之於性。非積習所能致。初爲兗州瑕丘尉。明皇聞之。命入供奉。更今名。以道子爲字。由此名震天下。其筆法超妙。爲百代畫聖。早年行筆差細。中年行筆磊落。如蓴菜條。人物有八面生意活動。其傳采於焦墨痕中。略施微染。自然超出縑素。世謂之吳裝。或謂張僧繇後身。信不誣也。供奉時爲內教博士。非有詔不得畫。官止寧王友。

翟琰。早師吳道玄。每道玄畫落墨已。卽去。多命琰布色。而道玄輒許可。故知琰自不凡。琰布色落墨。與道

玄真贊故未易辯也。

楊庭光與吳道子同時。善寫釋氏像與經變相。旁工雜畫山水等。皆極其妙。時謂頗有吳生體。但行筆差細。以此不同。其畫佛像多在山林中。

盧楞伽長安人。學於吳道玄。但才力有所未及。尤喜作經變相。入蜀名益著。雖一時名流。莫不效袨。乾元初。於大聖慈寺畫行道僧顏真卿爲之題名。時號二絕。

趙公祐成都人。工畫佛道鬼神。世稱高絕。太和間已著畫名。李德裕鎮蜀。以賓禮遇之。改蒞浙西。辟從蓮

模原注本長安人。寶曆中宦居於蜀。

趙溫其公祐之子。幼而穎秀。家學益工。筆法臻妙。

趙德齊溫其之子。襲二世之精藝。奇蹤逸筆。爲時推許。光化中詔許王建於成都置生祠。命德齊畫西平王儀仗。及朝真殿上。畫后妃嬪御。皆極精妙。昭宗喜之。遷翰林待詔。

范瓊不知何許人。寓居成都。與陳皓彭堅同時。俱以善畫人物得名。嘗作烏瑟摩像。設色未半而罷。筆蹤超絕。後之名手。莫能補完。

常粲長安人。咸通中路巖侍中牧蜀。日粲入蜀。略賓禮之。善畫人物。喜爲上古衣冠。不墮近習。有伏羲畫卦。神農播種。陳元達鎮諫等圖。則亦詩人主文而譎諫之義也。其子重胤。能世其學。尤善於寫貌。僖宗朝爲翰林供奉。

孫位東越人。僖宗幸蜀。位自京入蜀。自稱會稽山人。舉止疎野。襟韻曠達。喜飲酒。罕見其醉。樂與幽人爲

物外交光啓中畫應天寺壁勢若飛動後改名遇卒不知所在世稱龍水尤位所長原注德隅堂畫品載位爲蜀文成殿下將軍後遇異人得度世法故名遇云

張南本不知何許人善畫人物尤工畫火中和年寓止成都金華寺畫八明王時游僧升殿見火勢逼人驚怛幾仆時論孫位之水幾於道南本之火幾於神

辛澄不知何許人多遊蜀中工畫佛像不聞其他蓋專門之學也

張素卿簡州人少孤貧作道士僖宗時上表言丈人山在五岳上不當稱公詔可其請因賜紫嘗作十二真君像各寫其賣卜貨丹書符導引之意人稱其妙

道士陳若愚在蜀人師張素卿得其筆法

姚思元林泉人畫道釋一時知名作紫微二十四化皆所以警悟世俗非止遊戲丹青而自娛悅者

楊寧善畫人物與楊昇張萱同時皆以寫真得名開元間寫史館像風神氣骨不止於求似而畫至人物

爲難楊寧獨工其難而遂擅人物專門之習豈易得哉

楊昇不知何許人嘗寫明皇與肅宗像深得王者氣度蓋昇以寫照專門又當時親見奇表宜乎傳之甚

精

張萱京兆人善畫人物而於貴公子與閨房之秀最工其爲花蹊竹樹苗本作榭點綴皆極妍巧尤長於

寫嬰兒其畫婦人以朱暉耳根以此爲別

鄭虔鄭州榮苗本作榮陽人善畫山水山饒墨樹枝老硬黃筌山水有法度者好書嘗自寫其詩并畫獻

明皇明皇書其尾曰鄭虔三絕官止著作郎

陳閼會稽人爲永王府長史明皇召寫御容妙絕當時又嘗寫肅宗不惟龍鳳之姿逼真而筆英逸真與閣立本并馳交先故一時人多從其學韓幹亦以畫馬進明皇怪其無閼筆法使令師之其器重可知也

周古言不知何許人善畫人物尤工婦人多畫宮禁歲時行樂之勝世稱名筆然摹寫形似未爲奇特至於布景命意則意在筆外惟覽者得於丹青之所不到則知非常工所能爲也

周昉字景元一字仲朗長安人傳家閼閱好屬文窮丹青之妙遊卿相間貴公子也善畫貴遊人物作士女多爲穠麗豐肥之態蓋其所見然也又善寫真兼移其神氣故無不歎其精妙

王朏太原人官止劍州刺史喜丹青之習師周昉然精密則視昉爲不及一時如趙博文皆昉高弟也然朏過博文遠甚

韓滉字太冲德宗朝宰相當建中末值茲喪亂遂兼統六道節制出爲鎮海軍江浙東西兼荆湖洪鄂等道節度使中書令晉國公公退之暇留意丹青書師張顚畫師陸探微其畫人物牛馬極工尤好圖田家風俗嘗自言不能定筆不可論書畫以非急務故自晦不傳於人

杜庭睦不知何許人喜寫故實畫明皇研牘圖人物品流見之風神氣骨間非有得於心何以臻妙如此吳侁不知何許人作林泉平遠溪友釣徒皆有幽致鍾師紹蜀人妙丹青畫道釋人物犬馬頗工

尹繼昭不知何許人。工畫人物、臺閣，冠絕當世。

胡瓌，范陽人。工畫番馬，鋪敍巧密，近類繁冗。而用筆清勁，至於穹廬什器射獵，形容備盡。凡畫橐駝及馬，以狼毫筆疏染，取其生意，亦善體物者也。後以筆法授子虔。

胡虔，瓌之子。世謂丹青之學有父風。

李思訓，唐宗室也。官至左武衛大將軍。畫皆超絕。尤工山水、林泉。筆格遒勁，得湍瀨潺湲、烟霞縹渺，難寫之狀。用金碧輝映，爲一家法。後人所畫著色山，往往多宗之。然至妙處不可到也。

李昭道，思訓之子。官至中書舍人。作畫稍變其父之勢，然智思筆力，視思訓爲未及。然其妙亦至矣。世稱思訓爲大李將軍，昭道爲小李將軍。

盧鴻，字浩然，范陽人。隱嵩少間。開元中，以諫議大夫召，固辭。賜隱居服、草堂一所。令還山，頗喜寫山水平遠之趣。其筆意位置，清氣襲人。

王維，字摩詰。開元初擢進士。官至尚書右丞。家於藍田，輞川。善畫，尤精山水。觀其思致高遠，出於天性。初未見於丹青時，詩篇中已苗本有自字，有畫意。蓋其胸次瀟灑，落筆便與庸史不同。

王洽，不知何許人。能潑墨成畫，性嗜酒，多放教於江湖間。每欲作圖，必沉酣之後，解衣瀕礴，先以墨潑幛上。因其形似，或爲山石，或爲林泉，自然天成，不見墨汚之迹。蓋能脫去筆墨畦町，自成一種意度。原注張彥遠有王默師項容，又師鄭虔。酒後用頭髮取墨抵絹上，作山水松石。唐名畫錄有王墨善潑墨山水，故謂之王墨。疑（明別本作恐）卽此王洽也。

項容不知何許人。當時以處士名稱之。善畫山水。師事王默。作松風泉石圖。筆法枯硬而少溫潤。故昔之計畫譏其頑澀。然挺特巉絕。亦自是一家。張詢。成海人。不第後流。寓長安。以畫自適。後至蜀中。爲僧夢休作早午晚三景於壁間。謂之三時山。僖宗幸蜀。見之。歎賞彌日。

畢宏。不知何許人。善畫山水。作松石圖於左省壁間。一時文士有詩稱之。其落筆縱橫。變易常法。意在筆前。非繩墨所能制。故得生意爲多。

張璪。一作藻。字文通。吳郡人。官止檢校祠部員外郎。衣冠文行爲一時名流。善畫山水。松石。苗本作松石。山水。自撰繪境一篇。言畫之要訣。畢庶子宏一見驚異之。璪嘗手操雙管。一爲生枝。一爲枯柯。而四時之行。遂驅筆得之所畫。山水高低秀絕。咫尺深重。幾若斷取。一時號爲神品。

荆浩。河內人。自號洪谷子。博雅好古。以山水專門。頗得趣向。善爲雲中山頂四面峻厚。自撰山水訣一卷。嘗語人曰。吳道子畫山水。有筆而無墨。項容有墨而無筆。吾當采二子所長。成一家之體。故關仝北面。事之。世論荆浩山水爲唐末之冠。

漢王元昌。唐高祖第七子。博學善畫。李嗣真謂天人之姿。博綜伎藝。頗得風韵。自然超舉。有畫鞍馬鷹鶲傳於時。雖閔立德立本。不得以季孟其間。

江都王。緒唐瞿王元軌之子。太宗姪也。能書畫。最長於鞍馬。以此得名。官至金州刺史。杜子美詩謂國初已來畫鞍馬。神妙獨數江都王。爲一時所重。

韋無忝京兆人與弟無縱俱以畫稱尤善畫馬及異獸官至左武衛大將軍。曹霸髦之後髦以畫稱於魏霸在開元中畫已得名天寶末詔寫御馬及功臣像筆墨沉著神采生動官至左武衛大將軍。

裴寬絳州人以文辭進有能稱明皇時爲范陽節度使兼采訪使頗受眷知所畫小馬圖蕭散閒適筆墨典雅。

韓幹長安人王維一見其畫遂推獎之天寶初入爲供奉時陳閎畫馬榮遇一時明皇令師之幹不奉詔曰臣自有師今陛下內廄馬皆臣師也明皇益奇之後師曹霸畫馬得骨肉停勻法傳染入縑素弟子孔榮頗得其法。

韋鑒長安人善畫龍馬弟鑾工山水松石然傳於世者不多。韋偃父鑾官至少監善畫山水松石花鳥時名雖已籍籍而未免墮於古拙之習偃雖家學而筆力逾健風格高舉過父遠甚尤善畫馬其筆法磊落揮霍振動。

趙博文尚書左丞相涓之子世業儒喜丹青而於士女兔犬爲尤工絕無世俗區區形似之習戴嵩不知何許人初韓滉鎮浙西命爲巡官師滉畫皆不及獨於牛能盡野性過滉遠甚至於田家川原亦各臻其妙弟嶧亦以畫牛得名。

戴嶧嵩之弟喜畫牛善作奔逸之狀李漸不知何許人官任忻州刺史善畫番馬人物筆跡氣調當時號無儔。

李仲和漸之子善畫番馬人物有父遺風但筆力有所不逮也。張符不知何許人善畫牛頗工筆法有得於韓滉亦韓之派也。

滕王元嬰唐宗室也善丹青喜作蜂蝶朱景元嘗見其粉本謂能巧之外曲盡情理。

薛稷字嗣通河東汾陰人收之從子也書學褚河南畫蹤如閻立本善花鳥人物雜畫猶長於鶴得名於

古今焉稷在睿宗朝官至太子少保封晉國公

邊鸞長安人以丹青馳譽於時尤長於花鳥得動植物生意大抵精於設色如良工之無斧鑿痕耳然以技困窮卒不獲遇轉徙潞澤間米海岳論畫花亦謂鸞畫如生

于錫不知何許人善畫花鳥最長於雞

梁廣不知何許人善畫花鳥爲一時所稱故鄭谷海棠詩有梁廣丹青點筆遲之句

蕭悅不知何許人官爲協律郎喜畫竹深得竹之生意名擅當世

刁光胤長安人天復中避地入蜀善畫湖石花竹貓兔鳥雀之類慎交游所與者皆一時佳士黃筌孔嵩皆師事之

周滉不知何許人善畫水石花竹禽鳥頗臻其妙

朱審吳郡人得山水之妙亦畫人物竹木

王宰家於西蜀貞元中韋令公以客禮待之畫山水樹石出於象外多畫蜀山玲瓏竈竔嵯峨苗本作嵯

巧峭

楊炎貞元中宰相出貶崖州嘗畫松石山水出於人表。

程脩己其先冀州人祖大曆中任越中醫學博士時周昉任越州長史遂令脩己師事之盡得其畫人物口授之妙尤精山水花竹。

馮紹政善畫雞鶴龍水時稱其妙開元中爲少府監。

張遵禮善畫鬪將鞍馬戈矛器械用筆頓差小畫尤佳。

王紹宗琅琊人父修禮畫迹與殷仲相類。

蒯廉性野嘗愛畫鶴後師於薛稷深得其妙。

檀智敏時號檀生屋木樓臺出一代之製。

鄭嶠屋木樓臺師於檀生。

陳譚工山水德宗除連州刺史令寫彼處山水之狀每歲貢獻野逸不羣高情邁俗張藻之亞也。

劉商爲郎中性格高邁愛畫松石人物初師張藻後自造真爲意有觀奕圖石刻行於世。

王定爲中書常僻名達按應作癖於畫公政之外每圖佛像高僧士女皆冠於當代貞觀以畫得名。

黃諤畫馬獨善於時。

李靈省落托不拘檢長愛畫山水每圖一障非其所欲不卽強爲也但以酒生思傲然自得不知王公之

尊貴自得其趣耳。

張志和號煙波子嘗漁釣於洞庭湖顏魯公典吳興知其高節以漁歌五首贈之張乃隨句賦象人物舟

船煙波風月鳥獸皆依其文寫之曲盡其妙。

左全蜀人本儒家工畫佛道人物寶曆中聲馳宇內多倣吳生頗得其要。  
陳皓彭堅與范瓊同時同藝名振三川。

呂嶽竹虔尹繼昭弟子並長安人工畫道釋人物僖宗朝翰林待詔廣明中扈從入蜀  
麻居禮蜀人師張南本光化天復間聲迹甚高。

李洪度成都人人工畫道釋人物馳譽當時。

張騰不知何許人工道釋雜畫筆法布色頗窮其妙。

張贊何陽人工畫人物道釋。

王浹不知何許人善畫人物。

韓王元嘉善畫龍馬虎豹則天授太尉。

劉孝師斬智翼俱善畫。

梁寬吳智敏更爲俊逸。

王陁子善山水幽致峯巒極佳。

康薩陁爲振威校尉畫人馬措意極高。

王知慎工書畫師於閻與兄知敬齊名筆力爽利風采不凡。

王韶應一作韶隱畫鬼神深有氣韻一云善山水人馬。

李生吳弟子善畫地獄佛像有類於吳而稍弱。張藏亦吳弟子裁度龐快思若湧泉亦好細畫。

武靜藏善畫鬼神有氣韻。

董萼字重照開元中多在尚方善雜畫車牛最推其妙。陳靜心善寺壁弟靜眼善地獄山水。

程雅善雜畫。

楊坦楊仙喬並長安人好圖鬼神子爽亦善之。

解倩善鬼神。

姜皎上邦人善鷹鳥開元中官至祕書監。

李思誨林甫之父思訓之弟善丹青贈禮部尚書。

李林甫善山水類昭道。

李湊林甫姪善畫綺羅人物師閻令但筆迹疎散畫其媚態則盡美。

郎餘令有才名工山水古賢爲著作佐郎。

曹元廓則天時爲朝散大夫左尚方令師於閻王騎獵人馬山水。

劉行臣善畫鬼神類王朝隱。

暢譽善山水似李將軍譽子瑾妙過於父。

尹琳善畫佛像。高宗時得名。

李仲昌。李嗣真並琳弟子。

陸庭曜善人物鬼神。有氣韻。時稱第一。

僧智瑰善山水鬼神氣韻洒落。

殷令名陳郡人。父不害累代工書畫。

殷文禮字大端。書畫妙過於父。武德初爲中書舍人。

殷仲容文苗本作聞。禮子。則天時任秘書丞。善寫貌及花鳥。妙得其真。或用墨色如兼五采。亦邊鸞之次也。

談皓善畫人物。有態度。衣裳潤媚。與李湊小相類。

僧金剛三藏師子國人。善西域佛像。

宋令文善書畫。

司馬承禎字子微。善畫。又工篆隸。

釋翛然俗姓裴氏。善丹青。工山水。

鄭逾善山水。天寶中得名於梁宋間。

李果奴善寫人物。筆迹調潤。

張湮官至刑部員外郎。善畫山水。

劉方平工山水樹石。汧國公李勉甚重之。

王態官至潭州都督。善湘中山水。似李將軍。

王象有畫鹵簿圖。傳於代。

田琦雁門人。善人物。并寫貌。官至汝南太守。

李逖工畫蠅蝶蠭蟬之類。

李平均唐宗室。工山水。官至陳留令。

白旻工花鳥。官至澄城令。

韓嶷工婦女雜畫。善布色。

齊皎高陽人。善外番人馬。尤工山水。官至澤州刺史。

齊映皎弟。性雅正好學。善山水。贈禮部尚書。

史瓊官至省郎。善畫鞍馬人物。

戴重席工子女極精妙。

裴謂字士明。河東人。畫山水極有思。官至兵部尚書。

陳曇字玄成。工山水。有情趣。但峯岫少奇。往往煩碎。官至衡州刺史。

顧况字逋翁。吳興人。頗好詩詠。善畫山水。

鄭寓學昉畫天王菩薩。有思。

沈寧善樹石山水有格律師張璪而少劣。

蕭祐畫山水爲桂林觀察使。

劉鑒任祕書正字善山水同時有劉之奇亦能山水。

強穎善水鳥。

陳庶揚州人師邊鸞花鳥尤善布色。

陳恪工山水師張鄭人物鞍馬蟲禽并精子積善山水妙過於父。

周太素善畫花鳥佛像終尚書郎。

麴庭善山水格不甚高但細巧耳。

侯莫陳廈字重構工山水用意極精。

王宏太原人畫人馬永徵時人。

會稽僧道芬滎陽鄭町梁治青州吳恬并善山水芬格高鄭淡雅梁美秀吳險巧。

牛昭善山水。

高道興成都人光化中與趙德齊同畫西平王儀仗授翰林待詔。

趙德元長安人天復中入蜀工畫車馬人物山水佛像屋木。

陳義 般斂 般季友 許琨 同州僧法明 錢國養 左文通 宋抱一 孟仲暉已上皆開元時人善寫貌。

高江 車道政。

嗣滕王湛然善畫花鳥蠶蝶官至太子詹事。衛憲師周昉花木竹雀各造其妙。張立不知何許人蜀中畫跡甚多亦能墨竹。

五代

王商不知何許人工畫道釋仕女尤精外國人物與胡翼同時並爲都尉趙嵒所厚。燕筠不知何許人工畫天王筆法師周昉頗臻其妙然不見他畫獨天王傳於世。

支仲元鳳翔人畫人物極工筆法師顧陸緊細有力人物清潤不俗其畫神仙人物多作奕棋之勢宋高

宗題作晉六朝者多仲元所作。

左禮成都人工畫道釋像學吳道玄描染與楊庭光相類但行筆差細耳宣和畫譜謂與張南本筆法相似圖畫見閱志謂與張南筆法相似豈卽張南本也。

朱繇長安人工畫道釋妙得吳道玄筆意所畫未有不以爲法者時出新意千變萬態動人耳目弟子趙裔亦知名。

李昇成都人善畫人物尤善山水筆意幽閒人有得其畫往往誤稱王右丞者焉。

杜子瓊華陰人精意道釋研吮丹粉尤得其術故彩繪特異。

杜覩龜秦人避地居蜀事王衍爲翰林待詔博學強識善畫佛像人物始師常粲後捨舊學自成一家故

筆法凌轢畫流粲亦莫能接武也。

張玄苗本作元簡州金水石城山人善畫尤以羅漢得名。

曹仲元建康豐城人江南李氏時爲翰林待詔畫道釋鬼神初學吳道玄不成棄其法別作細密自爲一家尤工博彩。

陸晃嘉禾人善人物多畫道釋神仙性疎野每沉湎於酒遇筆揮灑略不預構故妍醜互出當其合作描法甚細而有力有一等繆畫籠惡可厭亦其所作。

僧貫休俗姓姜氏字德隱婺州蘭溪人初以詩得名後入兩川頗爲王衍待遇因賜紫衣號禪月大師能畫間爲本教像唯羅漢最著其畫像多作古野之貌不類世間所傳。

梁駢馬都尉趙嵒本名霖後改今名喜丹青尤工人物格韻超絕非尋常畫工所及尤能鑒畫。

杜霄善畫仕女得周昉筆法爲多尤工蠭蝶及曲眉豐臉之態非風流蘊藉有王孫貴公子之思致者未易得之。

丘文播廣漢人又名潛與弟文曉俱以畫得名初工人物兼作山水後多畫牛時稱奇絕子仁慶善畫尤長花雀。

丘文曉與文播齊名山水亦工阮郜不知何許人入仕爲太廟齋郎善畫工寫人物特於士女得纖穠淑婉之態但傳於世者甚少婦人童氏江南人莫詳其世系所學出王齊翰工畫道釋人物童以婦人而能丹青故當時縉紳家婦女

往往求寫照焉。後不知所終。

胡翼字鵬雲。工畫道釋人物車馬樓臺山水。種種臻妙。嘗臨模古今名筆。目之曰安定鵬雲記。衛賢長安人。江南李氏時爲內供奉。長於樓臺人物。初師尹繼昭。後伏膺吳體。其畫高崖巨石。則渾厚可取。而皴法不老。爲林木雖勁挺。而枝梢不稱其本。論者少之。然至妙處。亦人希及。

李贊華。本北虜東丹王。後唐明宗賜姓名。善畫本國人物鞍馬。不作中國衣冠。亦安於所習者也。然議者謂馬尚豐肥。筆乏壯氣。

王仁壽。汝南宛人。石晉時作侍詔。工畫道釋鬼神及馬。始師王殷。後學精吳法。

房從真。成都人。工畫人物番騎。王蜀時爲翰林待詔。

袁巍。河南登封人。爲侍衛親軍。善畫魚。窮其變態。得喰嚼游泳之狀。非世俗所畫庖中物也。僧傅古。四明人。畫龍獨造乎妙。弟子德饒。無染皆臻其妙。

關仝。原注一名襍。長安人。畫山水。師荆浩。晚年有出藍之美。所畫脫略毫楮。筆愈簡而氣愈壯。景愈少而意愈長。深造古淡。石樹出於畢宏。有枝無幹。當時郭忠恕亦師事之。然仝於人物。非所長。多求胡翼爲之。

杜楷。原注一作楷。成都人。善山水。作枯木斷崖。雲嶂烟岫之態。思致頗達。

羅塞翁。隱之子。爲吳中從事。喜丹青。善畫羊。精妙卓絕。張及之。京兆人。畫犬馬花鳥頗工作。犬得敦厖之狀。無搖尾乞怜之態。

道士厲歸真。莫知其鄉里。善畫牛虎。並工竹雀鶩禽。筆簡意盡。氣韻蕭爽。坡岸山林亦佳。

李靄之。華陰人。善畫山林泉石。尤喜畫貓於藥苗間。雅爲羅紹威所厚。建一亭爲靄之援毫之所。名曰金波時。號金波處士。

胡擢不知何許人。博學能詩。氣韻超邁。善畫花鳥。亦詩人感物之作也。

梅行思。原注一作再思。江夏人。畫人物牛馬。最工於雞。爲南唐李氏翰林待詔。品目甚高。

郭乾暉。北海營丘人。世呼爲郭將軍。工畫鷺鳥雜禽。疎篁槁木。田野荒寒之景。格律老勁。曲盡物性之妙。

鍾隱亦一時名流。變姓名師事久之。方授以筆法。

郭乾祐。乾暉弟。工花鳥。雖不如兄所學。亦相上下。

鍾隱。天台人。善畫鷺鳥榛棘。能以墨色淺深。分其向背。變姓名師。郭乾暉。深得其妙。兼工畫山水人物。

黃筌。字要叔。成都人。始學畫師刁光。早得時名。十七歲事蜀王衍爲待詔。至孟昶。加檢校少府監。累遷如京副使。花竹師。滕昌祐。鳥雀師。刁光。山水師。李昇。鶴師。薛稷。人物龍水師。孫位。資諸家之善。而兼有之。無不臻妙。

黃居寶。字辭玉。筌次子。工畫。得家傳。兼以八分書知名。事蜀爲待詔。累遷至水部員外郎。其畫石文理縱橫。爽砂爽石。稜角峭硬。如虬如虎。

黃居實。紹興祕閣中有會禽圖一。而諸書不載其名。筌有五子。不審其爲第幾人。

滕昌祐。字勝華。吳人。後游蜀。以文學從事。初不婚宦。志趣高潔。脫略時態。工畫花鳥蝶。折枝生菜。博彩

鮮澤宛有生意尤長於畫鵝蓋其觀動植而形於筆端未嘗專於師資也兼善書大字

李頤原注一作坡南昌人善畫竹氣韻飄舉不求小巧而多於情任率落墨便有生氣然所傳於世者不多

韓虬原注一作求李枳原注一作祝不知何許人皆倜儻不拘有經略才能屬唐祚陵季遂退藏不仕以丹青自娛學吳道玄尤長於道釋好游晉唐間爲李克用所殺

張圖字仲謀河南洛陽人朱梁時將軍少穎悟而好丹青及善潑墨山水皆不由師授自致神妙亦不法古今自成一體尤長於大像其畫用濃墨籠筆如草書顫掣飛動勢甚豪放至於手面及服飾儀物則用細筆輕色詳緩端慎無一欹吳怪怪奇奇自成一家法

朱瑤字溫琪不知何許人學吳道子由是知名

跋異汧陽人善畫佛道鬼神及大像

陶守立池陽人世業儒保大間應舉下第退居齊山閉門卻掃以詩酒丹青自娛善畫道釋鬼神殿閣車馬山川人物靡不精妙

竹夢松建康溧陽人仕南唐爲東川別駕善畫人物仕女臺閣冠絕當代其布景命意綽約體態宛得周昉之格

施璘字仲寶京兆藍田人工畫竹有生意爲當時絕伎  
丁謙義宜人工畫竹師蕭悅兼善寫蔬果

何遇河南長水人善畫宮室慕衛賢筆法尤善山水樹石爲當時所稱其間人物則假手於人  
梁相國于兢善畫牡丹幼年從學因覩檻中牡丹乃命筆倣之不浹旬奪眞後遂酷思無倦動必增奇  
梁左千牛衛將軍劉彥齊善畫竹頗臻清致有孟宗泣竹湘妃寺圖傳於世人物多假胡翼之手尤能鑒  
別圖繪皆極精當

王殷工畫佛道士女尤精外國人物

李羣字文幹唐宗室工畫人物爲世所稱

李玄應泊弟玄審並工畫蕃馬專學胡環

韋道豐江夏人善畫人物寒林逸思奇僻不拘小節當代珍之然經歲月方成一圖成則驚人

朱簡章江夏人工畫人物屋木

王喬士工畫佛道人物

鄭唐卿工畫人物兼長寫貌

郭權江南人師鍾隱

史瓊善畫雉兔竹石

程凝善畫鶴竹兼長遠水

王道古善畫雀竹當時號雀兒王

唐塈善畫野禽生菜水族諸物世稱精妙

王道求工畫佛道鬼神人物畜獸始倣周昉後學盧稜迦當時名手歎伏。宋卓工畫道釋志學吳筆不事傅彩。

富攷工畫佛道。

黃延浩工畫人物。

王偉工畫道釋。

張質定州人工畫畫田家風俗。

宋藝蜀郡人人工寫貌王蜀爲翰林待詔。

阮知誨成都人工畫貴戚子女兼長寫貌事王蜀爲待詔。

高從遇道興之子襲父藝爲孟蜀翰林待詔。

阮惟德知誨之子紹精父業事孟蜀爲翰林待詔尤善狀宮闈禁苑皇妃帝戚富貴之事精妙頗甚杜敬安覲龜之子事孟蜀爲翰林待詔妙於佛像尤能傅彩孟州名畫錄載爲杜子瓊子未知孰是趙忠義元德之子事孟蜀爲翰林待詔雖從父訓宛若生知。

蒲宗訓蜀人事孟蜀爲翰林待詔師房從真畫人物鬼神筆法雖細其勢甚壯蒲延昌宗訓養子爲孟蜀待詔工畫佛道鬼神尤精獅子行筆勁利用色不繁。

張孜成都人爲孟蜀翰林祇候工畫人物士女兼長寫貌徐德昌成都人爲孟蜀翰林祇候工畫人物士女墨彩輕媚爲時所稱。

周行通成都人工畫鬼神人馬鷹犬嬰孩得其精妙。

孔嵩蜀人善畫龍兼工花雀與蟬師刁處士。

趙才蜀人工畫人物鬼神亦長甲騎。

姜道隱漢州縣竹人韶亂好畫及長不事產業惟畫是好布衣芒屨隨身筆墨而已嘗於淨衆寺畫山水松石趙庭隱贈之十縑拂衣而去。

楊元貞石城山張玄外族也工畫釋道羅漢善爲曹筆尤精布色始居蜀後召入鄰中不回董從誨成都人世本儒家心游繪事佛道人物舉意皆精。

張景思金水石城山張玄之裔工畫佛道。

朱悰不知何許人與衛賢并師尹繼昭。

僧楚安漢州什邡人俗姓勾氏善畫山水人物樓臺點綴甚細論者謂筆蹤全虧六法非大手高格僧智蘊河南人工畫佛像人物學深曹體。

僧德符善畫松柏氣韻蕭灑住汴州相國寺。

李文才華陽人工畫人物屋木山水善寫真時輩罕及周昉之亞也事孟蜀爲翰林待詔。

杜弘義蜀州晉原人工畫佛像羅漢。

程承辨眉州彭山人工畫人物鬼神。

僧令宗乃丘文播異姓弟工山水人物佛像天王。

道士李壽儀。邛州人。宗張簡卿筆法。多畫道門尊像。人呼爲李水墨。吳越王錢鏗畫墨竹。

朱澄事江南李中主爲翰林待詔。工畫屋木。嘗與高太冲等合畫雪景宴圖。時稱絕手。高太冲江南人工傳寫事李中主爲翰林待詔。嘗寫中主真。得其神思。

浙僧蘊能。工雜畫。善畫佛像。

李夫人。西蜀名家。未詳世胄。善屬文。尤工書畫。郭崇韜伐蜀得之。夫人以崇韜武弁常鬱悒不樂。月夕獨坐南軒。竹影婆娑可喜。即起揮毫濡墨。模寫窗紙上。明日視之。生意俱足。或云自是人間往往效之。遂有墨竹。

李仁章。并州人。學吳畫。長於鬼神。當時論非盧稜迦無以並轡。

杜韜。京兆人。少爲富商。師衛賢。深得其要。賢後延爲東榻。所畫與賢相爲伯仲。此三字苗本作似。但此下

苗本有傷於二字。奇巧不老耳。

趙宏。字德彰。善畫花鳥。變邊鸞古體。而奪真像生也。

卷三

宋

仁宗天資穎悟。聖藝神奇。遇興援毫。超逾庶品。獻穆公主喪明。親畫龍樹菩薩。命待詔傅模鏤板印施。又

嘗畫馬上有押字并御寶。

徽宗萬幾之暇惟好書畫興較藝如取士法丹青卷軸具天縱之妙有晉唐風韻尤善墨花石作墨竹緊細不分濃淡一色焦墨蒙密處微露白道自成一家不蹈襲古人軌轍尤注意花鳥點睛多用墨漆隱然豆許高出縑素幾欲活動畫後押字用天水及宣和政和小璽志或用瓢印蟲魚篆文燕恭肅王元儼名重戚藩精於像物畫鶴竹圖曲盡其妙嘗自榜十六羅漢令蜀人尹質描染稜稜風骨非常人所能及

鄆王楷徽宗第二子善畫花鳥極爲精到尤善墨花但用墨粗欠生動耳

孫夢卿字輔之東平人工畫道釋人物深得吳法世謂之孫吳生

孫知微字太古眉陽彭山人世本田家天機穎悟善畫初非學而能清淨寡欲飄飄然真神仙中人喜畫道釋用筆放逸不蹈襲前人筆墨畦畛時輩稱服描法甚老黃筌不能及也

勾龍爽蜀人好丹青喜爲古衣冠多作質野不媚之狀尤善嬰孩得其態度國初爲翰林待詔

陸文通江南人畫山水道釋樓臺得名于時山水學董元巨然畫道釋尤工作神仙故實

王齊翰金陵人事江南李後主爲翰林待詔畫道釋人物多思致好作山林丘壑隱嵒幽卜無一點朝市風埃氣

顧德謙建康人善畫人物多喜寫道像此外雜工動植風格特異論者謂王維不能過而李後主亦嘗謂之曰古有凱之今有德謙其愛重如此

侯翌字子冲。安定人。善畫。端拱雍熙之間。聲名籍甚。學吳生落墨清駛。行筆勁峻。峭拔而秀。絢麗而雅。亦

畫家之絕藝也。始年十三。師郭巡官。郭忘其名。越四年。所學過郭遠甚。慮掩郭名。徙寓秦川。

武洞清長沙人。父岳學吳生。工畫人物。尤長於天神星象。用筆純熟。洞清能世其學。過父遠甚。作佛像。羅

漢善戰掣筆作鬚髮。尤工布置。落墨神妙不俗。

楊棐京師人。客游江浙。後居淮楚。善畫道釋人物。學吳生。尤於觀音得名天下。其子圭。有父風。描像手面作極細筆。

武宗元字總之。河南白波人。官至虞曹外郎。善丹青。長於道釋。造吳生闡奧。行筆如流水。神彩活動。大抵如寫草書奇作也。

道士李德柔字勝之。河東晉人。徙居西洛。喜讀書。丹青之技。不學而能。多畫神仙。故實蓋其夙世之習也。尤工寫貌。其設色所設。朱鉛多以土石爲之。故世俗不能宣和中爲凝神殿校籍。

道士徐知常字子中。建陽人。能詩。善屬文。尤通道儒典教。畫神仙事。明其本末。宣和中除蕊珠殿侍晨掣。蓋學其主李重光書法。至畫仕女。則無顫筆。大約體近周昉。而纖麗過之。

石恪字子專。成都人性滑稽。有口辨。工畫佛道人物。始師張南本。技進益縱逸。不守繩墨。多作戲筆人物。詭形殊狀。惟面部手足用畫法。衣紋皆粗筆成之。

李景道。南唐李昇親屬。喜丹青。而無貴公子氣。作文會圖。頗極其思。

李景遊景道季孟行也。好畫人物極勝。作談道圖。風度不凡。

顧閎中江南人事李氏爲待詔善畫人物嘗與周文矩同畫韓熙載夜宴圖。

顧大中江南人善畫牛馬兼工花竹。

郝澄字長源金陵句容人。作道釋人馬筆法清勁。善設色尤工寫貌。畫鑒載曾見澄畫馬甚俗。不過一工。人所爲殊無古意。二說未知孰是。當質諸博古者。

湯子昇蜀人畫山水人物頗工有鑄鑑圖傳於世。描法佳。

李公麟字伯時號龍眠居士舒城人。登進士第博覽法書名畫故悟古人用筆意。作書有晉宋風格繪事集顧陸張吳及前世名手所善以爲已有專爲一家作畫多不設色獨用澄心堂紙爲之。惟臨摹古畫用絹素著色筆法如雲行水流有起倒論者謂鞍馬逾韓幹佛像追吳道玄山水似李思訓人物似韓滉瀟灑如王維當爲宋畫中第一照映前古者也。官至朝奉郎。

內臣楊日言字詢直開封人喜經史作篆隸八分畫山林泉石人物荒遠蕭散氣韻高邁非世俗得以擬倫尤精寫照官至昭化軍節度使。

郭忠恕字恕先雒陽人少能屬文周時爲博士能篆隸善畫樓觀木石皆極精妙始亦嘗師關仝太宗素知其名召爲國子監主簿後忤旨流登州至齊之臨邑道中尸解仙去。

趙克夐宗室戲弄筆墨游魚蠱浮沉之態封高密侯。

趙叔儻宋宗室善畫多得意於禽魚每下筆皆合詩人句法景物雖少而意常多。

董羽字仲翔毗陵人善畫魚龍海水其汹湧瀾翻咫尺汗漫莫知其涯涘也事南唐爲待詔後歸宋爲圖

畫院藝學

楊暉江南人善畫魚得其揚鬚鼓鬣之態

徐易暨弟白海州人善畫魚極得其形似論者謂其皆作出水鱗不過刀機間物耳兼工雜畫尤能篆隸

爲御書院藝學

宋永錫蜀人畫花竹禽鳥魚蟹學梁廣善傳色

劉來少時流寓京師狂逸不事事放意詩酒間善畫水中魚雖風萍水荇觀之活動至於鱗尾性情遊潛迴泳皆得其妙官至朝奉郎

董源江南人事南唐爲後苑副使善畫山水樹石幽潤峯巒清深得山之神氣天真爛熳意趣高古論者謂其畫水墨類王維著色如李思訓兼工龍水無不臻妙其山石有作麻皮皴者有著色皴紋甚少用色濃古人物多用青紅衣人面亦用粉素皆佳作也

李成字咸熙唐宗室避地營邱遂家焉世業儒善文磊落有大志因才命不偶放意詩酒寓興於畫師關全凡烟雲變滅水石幽閒樹木蕭森山川險易莫不曲盡其妙議者謂得山之體貌爲古今第一子覺職踐館閣贈光祿丞

范寬原注一作中正字中立華原人性溫厚嗜酒落魄有大度人故以寬名之畫山水始師李成又師荆浩山頂好作密林水際作突兀大石旣乃嘆曰與其師人不若師諸造化乃捨舊習卜居終南太華偏

觀奇勝落筆雄偉老硬真得山骨而與關李並馳方駕也。晚年用墨太多土石不分。

許道寧長安人學李成畫山水初賣藥都門畫山水以聚觀者故蚤年所畫俗惡至中年脫去舊學稍自檢束行筆簡易風度益著峯頭直皴而下林木勁硬自成一家體至細微處始入妙理評者謂得李成之氣。

陳用志潁川郾城人居小窖鎮人呼爲小窖陳國初爲畫院祇侯名達按侯應作候已而告歸鄉里工畫道釋山林亦善人馬學胡環而多出己意雖詳悉精微但疎放全少無飄逸處也。

翟院深營邱人師李成畫山水爲本郡伶人郡宴方擊鼓頓失節奏部長舉其過守詰之翟對曰性本好畫操撾之次忽見浮雲在空宛若奇峯可爲畫範目不兩視故失其節翌日命院深爲畫果有疎突之勢甚異之其臨摹李成彷彿亂真若論神氣則霄壤也評者謂得李成之風。

高克明絳州人端愿謙厚喜游佳山水搜奇訪古歸則燕坐靜室故景造筆下亦喜道釋人馬花鳥樓觀評者謂其山水雖工不免有畫人之習無深厚高古之氣仁宗朝爲待詔守少府監主簿。

郭熙河陽溫縣人爲御畫院藝學善山水寒林宗李成法得雲烟出沒峯巒隱顯之態布置筆法獨步一時蚤年巧贍致工晚年落筆益壯。

孫可元不知何許人好畫吳越間山水筆力雖不至豪放而氣韻高古。

趙幹江南人爲南唐畫院學生畫山水林木皆江南風景多作樓觀舟船水村漁市花竹散爲景趣無一點朝市風埃。

屈鼎開封人畫山水學燕文貴頗有思致仁宗朝爲畫院祇候。

陸瑾江南人善畫江山風物落筆瀟洒殊無塵埃之氣筆法布置大抵宗王維嫵媚過之。

王士元汝南宛丘人王仁壽之子善丹青兼諸家之妙人物師周昉山水師關仝屋木師忠恕凡所下筆無一筆無來處故皆精微但多作樓臺橋徑如家中景乏深山大谷烟霞之氣耳官止郡推官

燕肅字穆之本燕人徙居曹今爲陽翟人文學治行縉紳推之喜畫山水寒林蹈王維之蹤倣李成之範獨不爲設色官至禮部尚書後贈太師

宋道字公達洛陽人擢第爲郎善畫山水閒淡簡遠取重於時但乘興卽寓意而作傳世故少

宋迪字復古道之弟以進士擢第爲郎師李成畫山水運思高妙筆墨清潤又喜畫松或高或偃或孤或雙以至於千萬株森然殊可駭也其猶子子房亦得家法

王穀字正叔潁川郾城人寓意丹青多取今昔人詩詞意趣寫而爲圖繪故鋪張布置率皆瀟灑官至大理卿

范坦字伯履洛陽人善畫山水其筆法學關仝李成兼工花鳥游藝繪事下筆老健官至承議郎

黃齊字思賢建陽人擢第爲兵部侍郎寓興丹青作風烟欲雨圖非陰非霧如梅天霧曉霏微掩靄之狀殊有深思

刑李公年不知何許人善畫山水運筆立意風格不下於前輩所布置者甚有山水雲烟餘思嘗爲江浙提刑

李時雍字致堯號適齋成都人崇寧間爲書學諭寓意丹青皆不凡作墨竹尤高與文同並馳官至殿中丞

駢馬都尉王說字晉卿本太原人後爲開封人喜讀書屬文所從遊者皆一時之老師宿儒能畫學李成山水清潤可愛又作著色山水師唐李將軍不古不今自成一家畫墨竹師文湖州築堂曰寶繪收藏古今法書名畫以爲勝玩東坡爲之記

內臣童貫字道輔開封人御下寬厚能節制兵戎時弄翰墨戲作山林泉石人以爲珍玩官至太傅內侍劉璣字伯玉開封人家多奇畫尤能考覈真僞皆極精當放筆作雲林泉石頗復瀟灑官至通侍大夫贈少師

內侍梁揆字仲敍開封人善丹青花竹人物山水一一能之官至直睿思殿

內侍羅存字仲通開封人性喜畫作小筆山水雖身在京國而浩然有江湖之思致官至尚食局奉御內侍馮覲字遇卿開封人少好丹青作江山四時之景頗極精妙慕王晉卿筆墨臨倣亂真官至武翼大夫

僧巨然鍾陵人善畫山水筆墨秀潤善爲烟嵐氣象於峯巒嶺竇之外至林麓之間猶作卵石松柏疎筠蔓草之類相與映發而幽溪細路屈曲繁帶竹籬茅舍斷橋危棧真若山間景趣也得董源正傳者巨然爲最也少年時攀頭多老年平淡趣高

趙令松字永年大年弟工畫花竹無俗韻尤工作水墨花果但作朽蠹太多論者或病之兼畫犬得名於

時官至右武衛將軍。

趙邈齧亡其名朴野不事修飾故人以邈齧稱不知何許人也善畫虎不惟得其形似而氣韻俱利樹石亦佳如草書法。

朱義江南人畫牛得名作斜陽芳草村落荒閒之趣雖望戴嵩不及而亦後來名家。

朱瑩義族也畫牛馬得名尤工人物。

甄慧睢陽人善畫佛像脫落世間形相具天人之威儀亦工畫牛馬而留意甚精。

王凝不知何許人爲畫院待詔畫花竹翎毛下筆有生意又工爲鸚鵡獅貓等。

祁序江南人工畫花竹禽鳥又工畫牛人或謂有戴嵩遺風至於畫猫近世亦罕有其比。

何尊師不知何許人居衡岳往來蒼梧五嶺僅百餘年人問其氏族年壽但云何何問其鄉里亦曰何何。

時人因號曰何尊師喜戲弄翰墨工作花石尤以畫猫專門爲時所稱。

趙宗漢字獻甫太宗曾孫濮王幼子博雅該洽無聲色之好惟以丹青自娛嘗爲雁圖氣韻瀟散有江湖荒遠之趣贈太師追封景王。

趙孝穎字師純端獻魏王第八子翰墨之餘雅善花鳥頗有思致仕至德慶軍節度使。

趙仲佺字隱夫宋宗室明敏無他嗜好一意於文詞翰墨間至於難狀之景則寄興於丹青善作草木禽鳥皆詩人之思致也封和國公。

趙仲箇字存道宋宗室長於宮邸雅好繪畫善花鳥出遊以筆籠粉墨自隨遇興見高屏素壁隨意作畫。

率有真趣，或求則未必應也。追封榮國公。

趙士臘宋宗室善畫寒林晴浦，甚多思致。其竹石禽鳥亦稱是。官任武節郎。

趙士雷明別本作雷，字公震。宋宗室。畫山水人物清雅可愛。尤長於花鳥。官至襄州觀察使。

李植字化光。京兆人。觀察使士衡之孫。自幼好道。不樂婚宦。工畫山水。劉貢父嘗贊之。

宗婦曹氏。雅善丹青。所畫花鳥等皆非優柔軟媚。取說兒女者。真若得於游覽。見江湖山川間勝概。以集於豪端耳。

南唐後主李煜字重光。自稱鍾峯隱居。又略其言曰鍾隱後人能文善書畫。書作顫筆。樅曲之狀。遒勁如寒松霜竹。謂之金錯刀。畫山水人物禽鳥墨竹皆清爽不凡。別爲一格。然書畫同體。高出意外。

黃居采字伯鸞。蜀人。筌之季子。初仕孟蜀爲翰林待詔。能世其家學。作花竹翎毛皆妙得其真。寫怪石山景。往往過其父。宋太宗朝授光祿丞。委之搜訪名畫。詮定品目。時輩莫不斂衽。當時較藝者。視黃氏體製爲優劣去取。自崔白崔慤吳元瑜出其格。遂大變。

邱慶餘蜀人文播之子。善畫花禽兼長於草蟲。凡設色者已逼真於動植。至其草蟲獨以墨之淺深疎發。亦極形似之妙。風韻高雅。爲世所推。初師滕昌祐。及晚年遂過之。

徐熙金陵人。世爲江南顯族。熙所尙高雅。寓興閒放。畫花木禽魚蟬蝶蔬果。妙奪造化。今之畫花者往往以色暈淡而成。獨熙落墨以寫其枝葉蕊萼。然後傅色。故骨氣風神爲古今絕筆。所畫多在澄心堂紙上。至於畫絹。絹文稍麗。米元章謂徐熙絹如布是也。議者謂黃筌之畫神而不妙。趙昌之畫妙而不神。

兼二者一洗而空之其爲熙歟孫崇嗣崇勳亦頗得其所傳焉。

徐崇嗣熙之孫畫花鳥綽有祖風又出新意不用描寫止以丹粉點染而成號沒骨圖以其無筆墨骨氣而名之始於崇嗣也。

徐崇矩熙之孫崇嗣崇勳其季孟焉畫花鳥能不墜家學作士女益工曲眉豐臉蓋寫花蝶之餘思也。唐希雅嘉興人妙於畫竹作翎毛亦工學江南李後主金錯刀書有一筆三過之法雖若甚瘦而風神有餘變而爲畫故顧掣三過處書法存焉喜作棘樞荒野之趣氣韵蕭疏非畫家繩墨所拘也。

唐宿唐忠祚皆希雅之孫善畫花竹翎毛得世傳之妙墨作棘鍼雖易元吉不能及之。

趙昌字昌之廣漢人善畫花果名重一時初師滕昌祐後過其藝作折枝有生意博色尤造其妙兼工於草蟲蓋其所作不特取其形似直與花傳神也禽石非其所精。

易元吉字慶之長沙人初工花鳥及見趙昌畫乃曰世不乏人遂遊荆湖搜奇訪古幾與猿狹鹿豕同游故口傳心繫之妙一寫於毫端又於長沙舍後開圃鑿池以亂石聚篁梅菊葭葦馴養水禽山獸以伺其動靜資於畫思故寫動植無出其右尤喜畫獐獮評者謂徐熙已後一人而已畫上多自書長沙助教易元吉畫。

崔白字子西濠梁人善畫花鳥道釋人物山林飛走之類尤長於寫生極工於鵝所畫無不精絕宋畫院較藝者必以黃筌父子筆法爲程式自白及吳元瑜出其格遂變宋仁宗朝畫垂拱殿御辰稱旨補圖畫院藝學。

崔慤字子中崔白弟工畫花鳥推譽於時筆法規模與白相若尤喜作兔自成一家官至左班殿直艾宣金陵人善畫花竹禽鳥能傳色暈淡有生意孤標雅致別是風規敗草荒榛尤長野趣尤喜畫鵠鴨

著名於時

丁貺濠梁人善畫花鳥

葛守昌開封人畫苑祇候善畫花鳥率有生意又工於草蟲蔬菜等物蓋其所兼耳

王曉泗州人善畫鳴禽聚棘鷹鶴師郭乾暉而遊其藩亦能畫人物極古拙嘗於李成讀碑圖上見之劉常金陵人善畫花竹氣格清秀名重江左家治園圃植花竹日遊息其間得意輒索紙落筆遂與造物者爲友染色不以丹鉛襯傅調勻深淺一染而就米海岳謂常之所學不減趙昌

武臣劉永年字公錫本彭城人後徙開封因家焉喜讀書曉兵法勇力兼人能從事丹青出人意表作鳥獸蟲魚頗工尤喜寫道釋人物得貫休之奇逸而用筆非畫家纖毫細管遇得意處雖聖帝可用此畫史所不能及也官至崇信軍節度使

武臣吳元瑜字公器開封人善畫花鳥人物山林師崔白描法纖細傳染鮮潤大變唐五代宋國初之法自成一家晚年因求畫者多因取他畫或弟子所模寫冒以印章謬爲己筆以塞其責官至合州團練使

內侍賈祥字存中開封人少好工巧至於丹青之習頗極其妙作竹石草木鳥獸樓觀皆工亦善人物官至知內侍省事贈少師

內侍樂士宣字德臣祥符人善丹青獨喜金陵艾宣畫久乃悟宣之拘窘於是捨其故步而筆法遂陵轍於前輩善畫花鳥尤工水墨官至虔州觀察使贈少保

內侍李正臣字端彥工寫花竹禽鳥頗有生意官至文思使

內侍李仲宣字象賢始專於窠木後喜工畫鳥雀頗造其妙其所缺者風韻蕭散蓋亦有所未至焉官至

內侍省供奉官

端獻王頽英宗第四子能篆籀飛白戲作小筆花竹蔬果尤喜寫墨竹無不曲盡其妙

趙令穰字大年宋宗室游心經史戲弄翰墨尤得於丹青之妙所作甚清麗雪景類王維筆汀渚水鳥有江湖意又學東坡作小山叢竹思致殊佳但筆意柔嫩實年少好奇耳

趙令庇宋宗室善畫墨竹宗文同凡落筆瀟灑可愛官至衡州防禦使

越國夫人王氏端獻王婦王審琦後作篆隸有古法爲小詩有林下風致以淡墨寫竹整整斜斜曲盡其態見者疑其影落縹素

駙馬都尉李璋字公炤其先錢唐人尚仁宗充國公主善作水墨畫竹石亦佳尤善章草飛白散隸官至平海軍節度使

劉夢松江南人善以水墨作花鳥於淺深之間互相映發雖采繪無以加也尤精於墨竹  
文同字與可梓橦永泰人稱石室先生又自號笑笑先生錦江道人善畫墨竹知名于時或戲作古槎老柂淡墨一掃雖丹青極豪楮之妙者形容所不能及也亦善山水官至司封員外郎充祕閣校理

李時敏字致道成都人時雍之弟尤工大字妙於丹青宣和內府有詩意圖官至朝請郎  
閻士安宛丘人家世業醫性喜作墨戲荆檣枳棘荒崖斷岸蟹燕蒲藻皆極精妙尤長於竹下筆清勁造

形圓備官至國子助教

梁師閔一作士閔字循德開封人能詩好畫花竹羽毛官至忠州刺史

僧夢休江南人喜丹青學唐希雅作花竹禽鳥盡物之態

武臣郭元方字子正開封人善畫草蟲信手寓興俱有生態官至內殿承制

武臣李延之善畫蟲魚草木禽獸寫生尤工官至左班殿直

僧居寧毗陵人喜飲酒酒酣則好爲戲墨作草蟲筆力勁峻不專於形似每自題云居寧醉筆

王瓘字國器河南洛陽人工畫道釋人物深得吳法世謂之小吳生武宗元謂瓘畫事物盡工設色清潤

古今無倫子端能世其學

王靄開封人畫佛像人物追學吳生能盡其妙尤長於寫真太宗朝授翰林待詔

趙光輔耀州華原人太宗朝爲畫院學生工畫佛道人物兼精蕃馬筆鋒勁利名刀頭燕尾

高益涿郡人工畫道釋鬼神蕃漢人馬用墨重傅色輕變通應手不拘一態

孟顯字坦之安化華池人畫佛道鬼神人馬屋木筆無少滯轉動飄逸出自己意自成一家大率作用氣格與陳用智相似

張昉字升卿汝南人工畫佛道人物學吳生僅得其法然用意敏速變態皆善

王端字子正山東人瓘之子喜讀書工畫山水人物花竹山水專師關仝好爲罅石磽水怪樹老根有出人意思亦善墨竹取唐希雅生竹情狀而爲之故於背向不失尤長寫眞畫鑒謂端人物古拙無神氣描法不秀

厲昭慶建業人工畫佛道人物尤長於觀音至於衣紋生熟亦能分別前輩殆不及授圖畫院祇候王兼濟洛陽人工畫釋道鬼神學吳道玄得其餘趣

高文進蜀人從遇之子工畫佛道師倣曹吳筆力快健施色鮮潤太宗朝爲翰林待詔

趙元長原注一作長元字慮善蜀人工畫道釋人物兼工翎毛授圖畫院藝學

趙元亨字彥德原注一字懷寶開封人工畫釋道人物兼長屋木多狀京城市肆車馬盡事物之情孫懷說安定靈臺人工畫道釋人物學吳生略得其奧乘興命筆往往稱絕評者謂氣格清峭理致深遠南簡平涼人性簡傲閉門獨居以畫自樂工畫佛道人物傳于世者絕少

王道真字幹叔蜀郡新繁人善畫佛道人物兼長屋木太宗朝爲畫院祇候亦善畫兼得楊輝之奧陳士元開封人初名允喜丹青之學尤好王士元筆遂改其名至于畫屋宇車騎子女皂隸及人家景物

若太湖石芭蕉花之類皆如王士元之迹

王拙字守拙河東人工畫佛道人物雖放縱矜逸往往失於卑懦

王居正拙之子學丹青有父風善畫仕女師周昉得其閒冶之態然精密有餘而氣韻不足葉進成江南人善畫人物士女設色清潤頗得閻令之體

燕文貴吳興人隸軍中善畫山水及人物初師河東郝惠又善畫舟船盤車其作山水不專師法自成一家細碎清潤可愛然取其骨氣無有也

葉仁遇江南人進成族弟工畫人物多狀江表市肆風俗田家人物

毛文昌字則之蜀人好畫郊野村堡人物能與真迫又爲村童入學圖其行步動止拜立誦寫備其風概

商訓不知何許人善鼓琵琶工畫山水師范寬但筆勢勾研山石少皴頗失之拙宋畫評載學關仝黃懷玉華原人有足疾時人目爲跛子學范寬頗有其格蓋意思孤特得其岩崎之骨樹木皴剝人物清

灑然大約失之工向嘗見一本清潤可愛而往往傳世者皆無足觀恐是僞作耳

紀真亦學范寬失之似

劉永開封人工畫山水始師僧德符畫松石後覩關仝畫遂捐棄餘學專法關氏意思筆墨頗得其法

李隱五原人善畫山水其勢超峻截空而立復有平遠之趣止以焦墨皴淡全無勾斫

龐崇穆字季和右北平人工畫山水能爲羣峯列岫雲烟聚散之象大中祥符中欲授以畫院之職遜去不仕

曹仁希字企之毗陵人善畫水爲驚濤怒浪萬流曲折以至輕波細溜於一筆自分淺深之勢甚佳古今無及

裴文曉開封人仁宗朝翰林待詔工畫水牛骨氣老重劄渲謹密亦一代佳手然形似乏古意不足也龍章字公絢京兆人性淳靜好古居亦冠帶善畫虎兔亦工道釋尤長於裝染

馮清陝郡閿鄉人。真宗時入圖畫院。善畫橐駝。兼工平畫。亦能畫火。韓拙字全翁。南陽人。善畫山水。窠石有山水純全集行于世。

荀信江南人。工畫龍水。真宗時翰林待詔。

吳懷江南人。善畫龍水。

吳進亦善龍水。

李用及開封人。能畫馬。深得韓幹筆法。人多稱之。亦善鬼神。宗吳生。

張翼一名鈴。豳國人。善畫蕃馬及人物。師趙光輔。得其筆法。但爲蕃族面目多類漢人。於體爲失。辛成不知何許人。籍隸軍中。工畫虎。有精神氣骨。

陶裔京兆鄆人。工畫花鳥。精於寫生。形製設色與黃筌相近。太宗朝爲翰林待詔。馮進成江南人。工畫犬兔。思慮精巧。尤善染澤。

解處中江南人。爲南唐後主翰林司藝。俗呼爲解將軍。善畫雪竹。有冒寒之意。但間泊翎毛。頗虧形似耳。毋咸之江南人。善畫雞毛。色明潤。瞻視清爽。大有生意。

傅文用開封人。工畫花鳥。有黃筌之風。特精野雉鶉鵠。能辨四時毛采。

李茂不知何許人。善畫人物。清麗可愛。

夏侯延祐字景休。蜀人。工畫花鳥。師黃筌。粗得其要。官至圖畫院藝學。劉文惠不知何許人。善畫花鳥。博采雖勤。而氣格傷懦。

王友字仲益漢州人師趙昌畫花果不由筆墨專尚設色得其芳艷之意比之於昌終乏潤澤之妙  
道士牛畿字受禧河內人工畫翎毛多信筆寫寒鵠野雉鳩子佳甚但枯棘不甚精高然筆墨粗豪縱放  
亦不俗師劉永年

李雄北海人工畫佛道偏長鬼神罕有倫比

蔡潤建康人善畫舟船及江河水勢太宗朝授圖畫院待詔

呂拙開封人工畫樓觀太宗營玉清宮拙畫鬱羅蕭臺樣稱旨授翰林待詔不就願爲本宮道士仍得賜  
紫拙畫屋木絕妙又能映帶池塘但人物傷繁耳

劉文通開封人善畫樓臺真宗朝入畫院爲藝學

宋澥字則未聞長安人湜之弟司封道之從祖高潔不仕善畫山水林石

隱士趙雲子善畫道像於青城文人觀畫諸仙奇絕

袁仁厚師李文才

郝處江南人工畫佛道鬼神兼長寫貌

顧洪祝不知何許人工畫人物

高懷節文進長子太宗朝爲翰林待詔頗有父風兼長屋木

董仁益字友賢蜀人工畫人物尊像出自天資不由師訓筆力勁健類孫知微

龍章京兆機陽人工畫道釋人物兼工傳寫尤善畫虎子淵有父風

鍾文秀開封人爲翰林待詔工畫道釋山水學關仝。

田景慶陽人工畫人物有奇思。

李元濟太原人工畫道釋人物精於吳筆。

王易鄜州人亦工佛道人物學隣元濟。

陳坦晉陽人工畫道釋人物其畫田家固爲獨步。

張宗古工山水。

道士李八師亡其名邛州依政人工畫道門尊像。

劉道士亡其名建康人工畫佛道鬼神落筆迺怪尤善山水師董源與巨然同時畫亦同但劉畫道士在左巨然則以僧在左以此爲別耳。

丘訥河南雒陽人工畫山水體近許道寧筆氣不逮而用墨過之。

郝銳不知何許人工畫山水。

梁忠信開封人仁宗朝爲畫院祇候工畫山水體近高克明而筆墨差嫩又寺宇過盛棟道兼繁。

李宗成鄜畤人工畫山水寒林學李成破墨潤媚取象幽奇林麓江皋尤爲盡善評者謂得成之似董贊潁川長社人工畫山水寒林學志精勤豪鋒老硬但器類近俗格致非高。

侯封鄆人爲圖畫院學生工畫山水寒林師許道寧不能踐其老格然筆墨調潤自成一體亦郭熙之亞符道隱長安人工畫山水寒林學無師法多從己見當其合作亦有可觀。

僧擇仁寓永嘉善畫松初集諸家所長而學之後夢吞數百條龍遂臻神妙性嗜酒每醉揮墨於絹紙粉堵之上醒乃添補千形萬狀極於奇巧

吳僧繼肇工畫山水與巨然同時體亦相類但峯巒稍薄怯也

劉贊蜀人工畫花鳥龍水迹意兼美

李符襄陽人工畫花彷彿黃體而丹青雅淡別是一種風格然於翎毛骨氣有得失耳

李懷袁蜀人工畫花鳥學黃氏與夏侯延祐不相上下

李吉開封人嘗爲畫院藝學工畫花鳥學黃氏

侯文慶開封人爲翰林待詔工畫草蟲及寫蔬菜體尙精謹殊乏生氣

董祥開封人爲翰林待詔工畫花木有琉璃瓶中雜花折枝人多愛之

李祐河內人善畫花鳥

建陽僧惠崇工畫鵝雁鶩鷺尤工小景善爲寒汀遠渚瀟灑虛曠之象人所難到也

卑顯不知何許人真宗朝爲翰林待詔工畫馬有韓幹之風筆力勁健

張戡瓦橋人工畫蕃馬居近燕山得北人形骨之妙盡戎衣鞍勒之精

邱士元不知何許人人工畫水牛精神形似外特有意趣

胡九齡絳人工畫水牛筆弱於裴文睨而意瀟灑愛作臨水倒影牛人多稱之

包貴宣城人善畫虎名聞四遠號老包也

包鼎貴之子雖從父訓抑又次焉。

任從一開封人仁宗朝爲翰林待詔工畫龍水海魚爲時推賞。戚文秀工畫水筆力調暢畫清濟灌河圖一筆長五丈自邊際起通貫於波浪之間與衆毫不失次序超騰回摺畫鑒載常州佛寺後壁有徐友畫水亦名清濟貫河中有一筆尋其端末長四十丈筆法旣老波浪起伏相對活動愈看愈奇。

路衡推亡其名不知何許人善畫魚體致純古。

劉仲懷山陰人元祐徙居諸暨善畫墨竹筆法師文湖州。

蒲永昇成都人性嗜酒放浪善畫水東坡嘗得其畫每觀之陰風襲人毛髮爲立。

何霸不知何許人工畫船水其名尤著。

支選不知何許人仁宗朝爲畫院祇候工畫太平車又畫酒肆邊綾縛櫻子有分疏界畫之巧兼工雜畫趙喬不知何許人工雜畫兼長道釋人物學朱繇用筆少亞而博彩爲精亦善花鳥。

高懷寶懷節之弟工畫花鳥草蟲蔬果頗臻精妙與兄懷節同爲畫院祇候高氏自道興至二子凡四世皆以畫進延賞於世誠可佳矣。

鄧隱梓州人工佛像鬼神山水花鳥。

張敦禮汝梁人哲宗時也畫人物樹石并倣顧陸筆法緊細神采如生贈太師程坦善雜畫松竹頗佳人物甚俗米元章謂能汙茶坊酒肆者此論真是。

僧仲仁會稽人住衡州花光山以墨暈作梅如花影然別成一家所謂寫意者也

趙叔益字伯充宋宗室善畫馬

趙士暕字明發宋宗室讀書能文兼工畫有高軒過圖

趙士衍宋宗室號花一相公長於著色山水意韻可喜

趙士安宋宗室長於墨竹不遵川派好作筀竹殊秀潤

蘇軾字子瞻眉山人高名大節照映古今復能留心墨戲作墨竹師文與可枯木奇石時出新意木枝幹

虬屈無端石皴老硬大抵寫意不求形似

米芾字元章天資高邁書法入神作畫喜寫古賢像山水其源出董源天真發露怪怪奇奇枯木松石自有奇思

晁補之字無咎濟北人善畫山水官至知泗州事

劉涇字巨濟簡州人米元章書畫友也善作林石槎竹竹以圈筆爲葉筆墨狂逸體製拔俗極有奇思官至職方郎中

蘇過字叔黨東坡先生季子也善作怪石聚篠咄咄逼翁又畫山水遠水多紋依崖多屋木皆人跡絕處並以焦墨爲之此出奇也官至中山倅

宋子房字漢傑鄭州滎陽人少府監選之子復古之姪善畫山水不古不今稍出新意官至正郎程堂字公明眉人善畫墨竹宗文湖州好畫鳳尾竹其梢極重作回旋之勢而枝葉不失向背尤善寫園

蔬極佳。

范正夫字子立。潁昌人文正公諸孫德孺之子。長於水墨雜畫。標格清秀。有訪戴圖。鵠令圖。竹石圖。知鳳翔還鄉。死於兵。

顏博文字持約。德州人。長於水墨。作人物筆法位置如李伯時。但氣韻差短耳。又善墨花。  
任誼字才仲。宋復古之甥。畫山水。鬢鬚龍眠。清潤可喜。亦能畫花。隸書學蔡中郎。官澧州通判。

李石字知幾。資州人。醉吟之餘。時作小筆風調遠俗。官至成都倅。

杭士林生。作江湖景。蘆雁水禽。氣格清絕。米元章謂可並徐熙。在艾宣張涇之右。南唐無此畫。

寶覺大師。畫翎毛蘆雁。甚不俗。

李甲字景元。華亭人。作逸筆翎毛。有意外趣。木不佳。

周純字忘機。成都華陽人。後久留荆楚。亦自稱楚人。畫山水。師李思訓。衣冠師顧愷之。佛像師李伯時。尤

善畫花鳥。松竹牛馬。一一清絕。

高燾字公廣。沔州人。自號三樂居士。作小景。自成一家。清思可人。一洗工氣。眠鴨浮雁。枯柯衰楊。最爲珍絕。篆隸飛白。一一造妙。

僧德正。信州人。徐兢明叔之兄。徐林穉山之弟。登科爲平江教官。棄而爲僧。能畫山水人物。種種清絕。專師李伯時。

劉明復。善畫山水。師李成。官至直龍圖閣。

薄長源字永仲作著色山水頂似荆浩身似李成葉取真松爲之如靈鼠尾大有生意石不甚工作凌霄  
花纏松亦佳作

鄆陵王主簿原注亡其名長於花鳥東坡曾題其折枝花。

李世南字唐臣安肅人善畫山水寒林官至大理丞

趙宗閔畫墨竹山谷嘗題之官至尚書郎

薛判官不知其名善墨竹

倪濤字巨濟宣和間爲都司善畫墨戲草蟲

文勛字安國善畫山水官至太府寺丞

劉延世字王孟新喻人公是先生敝之猶子善寫墨竹築堂曰抱瓮爲講書之所

王沖隱名持字正叔長安人畫禽鳥竹棘師崔白

靳東發字茂遠工畫人物集古今諫諍百事爲圖號百諫圖官至州倅其子詠字少張亦善山水

李頤字粹老嘗畫山并詩上東坡東坡次其韻

陳直躬高郵人工畫禽雁

朱象先字景初松陵人馳名元符間善畫

張無惑山人也善山水

何充姑蘇人能寫貌擅藝東南無出其右

眉山老書生不得其名作七才子入關圖山谷謂人物各有意態以爲趙雲子之苗裔摹寫物象漸密而放浪閒遠則不逮也

雍秀才不知何許人善畫蟲魚

章友直字伯益善畫龜蛇頗有生意

黃斌老潼川安泰人文湖州妻姪登科任戎倅善畫竹

黃彝字子舟斌老弟善畫竹

劉明仲善作竹

黃與迪善墨竹

楊吉老字克一張文潛之甥善畫竹

成子不得其名善畫山水

張遠字行之太原榆次人隱居山間善畫山水

張明遠之姪亦擅名山水

王元通滄州人工山水師李成爲人豪逸每畫竟大呼奇奇數聲乃得意筆也

閻丘秀才江南人不記名長於畫水無所宗師自成一家

喬仲常河中人工雜畫人物師李伯時

孔去非汝州人寧極先生之後長於小筆清雅可玩尤工草蟲螽蟬竹雀甚可觀

劉松老字榮祖巨濟之子書學米元章畫師東坡

王逸民永康導江人初爲僧名紹祖詩畫俱效周忘機而氣韻縣絕也學山谷草書亦佳馮久照字明遠汾州人後寓蜀畫山初頗繁冗後因郭熙之孫游卿來爲太守盡以家學傳之其格遂一變

劉履中字坦然汴人也善畫人物筆勢雄特仙佛亦其所長但故事人物未脫工氣

劉銓字真孺成都人喜畫山水尤工佛像描墨成染與李道明無異而清勁過之

季皓字雲叟唐臣孫也避亂入蜀畫山林

張嗣昌字起之與可外孫筆法既有所授每作竹乘醉大呼然後落筆

婦人盧氏許州人能作墨竹梅聖俞嘗賦詩題之

任粹才仲之姪能作著色山水

雍巘字幼山興元人善山水作岩崖枯木雲氣畫墨梅尤佳

牟谷不知何許人善傳寫能正面真真宗朝授翰林待詔

尹質蜀人工傳寫兼長雜畫

歐陽譽開封人工傳寫

僧維真嘉禾人苗本有工字傳寫

僧元靄蜀人太宗朝供奉工寫貌

禦肇字天啓丹陽人登進士第仕至從官畫山水人物尤好作枯槎老樹怪石奔湍頗多古意程若筠宣政間太乙宮道士善作古木老棘殊峭勁兼寫花竹翎毛疏渲頗工花則每樹只作數花亦頗

清雅

道士蕭太虛畫墨竹墨梅松柏雜樹每畫須用濃墨作枝梢其上幹量梅花有山林清幽氣象題名作陰文篆字於石上如石刻然自作一格清奇可愛

甘風子關右人佯狂好酒畫人物以細筆作頭面動以十數然後放筆如草書法以就全體頃刻而成妙合自然多畫列仙之流

王顯道漢州人本餅師後專心畫龍格製雄壯

成宗道長安人工人物兼善刻石臨摹吳筆上石真迹細如絲髮不失精神體段宛然如畫三朵花房州人不知姓名嘗戴三朵花故名之能自寫真

眉山道士羅勝先自號雲和山長善山水有古意

李時擇遂寧人見武洞清所畫羅漢豁然曉解得其筆法兵亂歸蜀卽以畫名

楊大明字民瞻號至樂子善龜蛇

僧真慧杭人畫山水佛像近世佳品翎毛墨竹有江南氣象

惠洪覺範能畫梅竹用皂子膠畫梅於生縫扇上燈月下宛然影也筆力於枝梗極遒健道宏峨眉人姓楊受業於雲頂山相貌枯瘁善畫山水佛像晚年似有所遇遂冠巾改號龍岩隱者

妙喜師長寫貌

道臻嘉州石洞僧能墨竹

吳僧法能工畫羅漢

祖鑒成都僧善觀音

智平成都清涼院僧善畫觀音

虛已成都相林院僧善山水

覺心字虛靜嘉州人善畫草蟲後工山水

智源字子豐遂寧人工雜畫尤長於人物山水

智永成都僧工小景長於傳模宛然亂真

真休漢嘉僧善模搨人物如真

宋莊字臨仲漢傑之孫其山水氣韻得家法但筆未老耳

賈公傑字千里昌期孫炎之子學馬賈而標格過之又作佛像極精細衣縷皆描金而不俗

郭道卿字仲常游卿字季熊熙之諸孫皆爲郡守頗有家學善畫馬其筆法真季孟也

高大亨字通叟長於山水

錢端回戚里人善寫平遠

李景孟字仲淳善畫馬尤於圖畫鑒別精確

邵少微字叔才澤民子工畫石竹禽獸筆墨草具而有餘意。

李元崇字季姚文正公裔無盡甥畫山水師范寬清潤可喜官至縣令。

葉漢卿

李漢舉

楊道孚

薛彥晦

王佐才

雷殿直已上俱善墨竹

道士田白兗州人畫竹石學東坡

李蕃字元翰成都人才元之曾孫能畫道釋人物全學范瓊但不喜布色崇德郡君李氏王之才妻公擇之妹能臨松竹木石見本卽爲之卒難辨臺亨夏縣人元豐中修景靈宮調天下畫工亨名第一待詔翰林固辭歸養和國夫人王氏宗室仲輓室善字畫兼長翎毛

張嗣昌母文湖州第三女嘗臨湖州黃樓障暮年以手訣傳嗣昌

章友直女名煎能如其父篆筆畫棋盤

任才仲妾法藍有絕色善著色山水

桐廬方氏陳晦叔子婦作梅竹極清遠。  
魏觀察宣政宦寺善墨竹。

劉國用漢州人。工畫羅漢。

陳自然工畫佛兼長水禽。

于氏不記名河東人能畫佛道鬼神。

雷宗道商州人工雜畫尤長於佛像山水。山水似郭熙。  
能成甫工畫佛像山水官至縣令。

費宗道蔡州人畫佛道鬼神。

吉祥平陽人工佛道筆墨輕清山水亦佳。

司馬寇汝州人佛像鬼神人物種種能之。宣和間稱第一手。

楊傑閩州人長於鬼神。每下筆先畫手足然後三兩筆成就全體。  
張通鄜州延人長於仙佛。

李士雲金陵人。

程懷立南郡人。

朱漸開封人。

朱宗翼

徐確俱善寫照。

劉宗道開封人。作照盆孩兒。以手指水影。影亦相指。形影自分。杜孩兒開封人在宣政間。其筆盛行。

王可訓京西人。元豐待詔。工山水。自成一家。池州匠畫秋浦九華。粗有清趣。師董元。

李明善山水。

蔡規建昌人。善山水。

廉至誠不知何許人。善畫山水。意匠精深。筆力高古。補將仕郎。

賀真延安人。出自戎籍。畫人物山水。古木怪松。得郭熙筆法。

甯濤華陰敷水人。師范寬。多作關右風景。其巧過寬。而渾厚藏蓄不及。蓋樓觀人物。失於太顯。甯久中濤子也。工山水人物。得出俗之態。筆意不減其父。但多平遠道路之景。不起峯頂耳。

高洵開封人工山水師高克明。尤長於湖石。晚年復師范寬。花鳥師程若筠。

馮曠河內人工山水體製不類前人。自成一家。筆墨蒼老。峯巒秀潤。名馳熙寧間。

何淵畫院人。專師高克明。往往逼真。然失之繁碎。

劉翼耀州人。呼爲劉評事。學范寬而有自得處。

宋處邢州人。善畫山水。會模郭熙溝溪春溜圖。

李遠青州人學李成氣象深遠馳名崇觀間

郝士安太原榆次人張遠弟子事師甚敬常執杖倚立左右

張舉懷州人山水尤長濺瀑

趙林字子安懷州人善山水步驟李成

郭鐵子榆次人學李成善鍛鐵作方響故號之

老成洛州人工雜畫尤長山水性沉靜筆法謹細如其人

李希成華州人慕李成遂命之初入畫院自晦以妨忌嫉比已補官始出所長

田相陝州人學李成意韻深遠筆墨精簡

蒙亨華州人明苗本無人字學甯濤山水得典型也

戰惠淳畫院人能著色山水人物甚小青衫白袴烏巾黃履不遺毫髮又作紅花綠柳清江碧岫一扇之間有十里光景真可愛也

和成忠京西人宣和待詔學李成山水筆墨溫潤病在烟雲太多爾

劉仲先成都人善山水

郝孝隆太原人師李成

瀟湘劉堅師范寬頗柔媚樓閣人物種種皆工多作小圖無豪放之氣時作竹石甚有風致畫院學生

尹白汴人專工墨花習花光梅扶疏縹渺

李覺京師人字民先長於山水醉後能潑墨作圖曲盡自然之態

張涇姑蘇人米元章稱其翎毛蘆雁不俗

陳常江南人以飛白筆作樹石有清逸意折枝花亦以逸筆一抹爲枝以色亂點花欲奪造花妙作也人物不工

張希顏漢州人初名適善畫花師趙昌大觀初累進畫花得旨補畫學諭後變從院體官至蜀州推官任源漢州人少隸軍籍師張希顏盡得其法

費道寧懷安人善畫花多作交枝

楊寵成都人善畫花可亞費道寧

楊祁彭州人善花鳥又工畫雞

李猷河內人長於鷹鶴精神態度曲盡其妙

韓若拙洛人善翎毛政和間兩京推爲絕筆

孟應之不知何許人精於翎毛

老麻關中人熙寧間以花鳥稱非蜀之居禮也

宣亨汴人精於花鳥

胡奇長安人長於蘆雁

鮑洵京西人工花鳥弟洋亦善其技

盧章汴人。工畫花鳥。多畫禁中佛像。

劉益字益之。汴人。工花禽。宣和間與富燮供御。多取內殿珍禽。謫玩以爲法。其描染類郭乾暉。尤長小景。靖康之難流落嶺表。多畫山果野禽。故人呼爲劉村子。椿世其業。

富燮汴人。宣和間與劉益同供御。布景運思。過於益。

夏奕不知何許人。工翎毛。畫鴻鵠作對。而皆雄。蓋求脫俗也。

田逸民濟南人。長於墨竹。極佳。入宣和畫院祇應。

李誕河間人。多畫叢竹。筍籜鞭節。色色畢具。此宣和體也。

張舜民字芸叟。號浮休居士。嗜畫山水。作秋景。自賦詩云。我有故山常自寫。免教魂夢落天涯。畫上有浮休二字可辨。紹聖貶筠州。紹興初追復直學士。

李遵易不知何許人。善畫魚。

侯宗古善畫龍。

郗七不知名。亦善畫龍。比宗古有筆力。

陳舉漠州人。長於蕃馬。頗盡胡態。張戡之甥也。路舉并州人。善畫橐駝。兼長鬼神。

龔吉不知何許人。長於兔。人所不及。

吳九州燕人。善畫鹿。曲盡其態。

周照專畫狗。

郝章汾州人長於人馬。

老侯瀘州人善畫猿鹿兼長花鳥頗有生意。

趙樓臺不知名相州人善畫屋宇。

郭待詔趙州人善界畫。

任安汴人工界畫每與賀真合手作圖軸。

陶績金陵人畫花果尤工蔬菜。

薛志字子尙長於水墨雜畫翎毛不逮花果不善設色。

馬賁河中人宣和待詔工畫花鳥佛像人物山水尤長於小景。

周曾不知何許人與馬賁同時差高於賁尤長山水。

段吉先不知何許人晁無咎曾題其小景。

李達汴人好作沙汀遠岸含畜不盡意。

楊威絳州人工畫村田樂。

郭思熙之子亦善雜畫崇觀中應制畫山海經圖其中瑞馬頗得曹韓遺法。

妙頤真南陽人畫墨鬼暈淡有致山谷嘗跋之。

黃宗道宣和畫院待詔工畫人物蕃馬師胡環東丹王世論胡畫馬得肉東丹得骨宗道二法俱備畫上寫京師黃宗道

道士林靈素善作墨竹湖州元妙觀有石刻一枝尚存

陳珍蜀人畫花竹學徐熙

何澄長沙人工畫神佛因其祖曾收武洞清畫本甚多觀習久之得其遺意然後落筆自幼自長無日不作老而愈勤傳染簡淨不假重色

賈行恭北地人善寫道釋鬼神尤長於巨人大馬

郭信京師人補畫院賜绯待詔或云熙之裔工畫道釋落筆細明苗本作納秀亦善山水得李成惜墨法氣象清曠其皴捨又類賀真亦一代奇筆也

呂漸洛陽人工畫佛像威儀雄偉尤善山水窠石深得位置

周與權長沙人工畫佛像筆法勁爽

田松舞水人工畫道釋人物筆法勁健傳染輕淡

王藻工畫牛馬

趙宣用飛白筆作人物宣和元年試中畫人

洪子範東京人工人物山水

楊安道九江人學范寬山水用焦墨太重耳

戴琬京師人宣政間在翰林恩寵特異工翎毛花竹嘗得入閣供奉後因求者甚衆徽宗聞之封其臂不令私畫故傳世者鮮

王登仕中原人畫佛道像別具一體衣帶飄薄

超師北地人宣和畫院名手工道釋人物

張武翼名諒工道釋人物其蹟爲畫家格範今世稱院體者是也二子永年康年永年後事劉益學花鳥

康年有父風未中年而卒

張戢不知何許人志尚清虛每以琴自娛工畫山水應奉翰林日徽宗遣其乘舟往觀山水之勝作八景圖未及進上而薨作遂留滯湘中

傅逸京師人工畫人物師張諒善描染

王晟景陵人師張諒長而變法尤善山水初學張戢後亦變體

盧道寧少事張諒工畫神佛尤精博染作山水師賀真多作寒林古木用墨恬淡

丁晞顏字令子書畫皆精全似李伯時嘗有所畫孝經

## 卷四

宋南渡後

高宗書畫皆妙作人物山水竹石自有天成之趣上用乾卦印晚居北內多用太上皇帝之寶德壽殿寶

御府圖

趙士遵高宗之叔封漢王善人物山水著色景頗似李昭道紹興間一時婦女服飾及琵琶阮面所作多以小景山水實始於士遵然其筆超俗特一時倣倣宮中之化非專爲此等作也

趙子澄字處廉宋宗室嘗作濺瀑欲動屋筆力極邁壯

景獻太子諱詢燕王德昭九世孫希擇之子善畫竹石其子迺裕孝宗之弟也官至保寧軍節度使臨川郡王謚莊靖書學高孝兩朝筆法尤工墨竹喜作挂屏長竿枝梢旁出如簷底乍見濃墨獵獵頗具掀舞之態題詩其上用善雅堂印

趙師宰字牧之居天台臨海登真西山門學墨竹得徐熙之妙見稱於人號隨菴

趙與懃居處州青田正惠公希暉之子嘉熙間知臨安府以右文殿修撰奉祠與兄與巒以治辦並稱於時臨模古畫莫能辨善作墨竹號蘭坡

趙伯駒字千里善畫山水花禽竹石尤長於人物精神清潤能別狀貌使人望而知其詳也高宗極愛重之仕至浙東兵馬鈐轄

趙伯驥字希遠千里弟善畫山水人物尤長於花禽傅染輕盈頓有生意嘗畫姑蘇天慶觀樣進呈孝宗書其上令依元樣建造今元妙觀是也仕至觀察使子師翠官至八座

趙孟堅字子固號彝齋居士居海鹽廣陳鎮寶慶二年進士修雅博識人比米南宮東西遊適一舟橫陳僅留一榻假息地餘皆所挾雅玩之物意到左右取之吟弄忘寢食過者望而知爲趙子固書畫船也

善水墨白描水仙花梅蘭山礬竹石清而不凡秀而雅淡有梅譜傳世官至朝散大夫嚴州守

趙孟淳字子真子固之弟繼秀安僖王後自號竹所墨竹可觀

趙孟奎字文耀太師忠惠公與憲之子號春谷畫竹石蘭蕙官至祕閣修撰

吳琚字居父憲聖皇后姪太寧郡王益之子性寡嗜好日臨古帖以自娛字類米南宮以詞翰被遇孝宗非它戚屬比嘗作墨竹坡石品不俗自號雲壑歷尙書郎部使者直學士慶元年間以鎮安節度使留守建康遷少保謚忠惠世稱吳七郡王汴人

楊瓊字繼翁恭仁皇后姪孫太師次山之孫度宗朝女爲淑妃官列卿好古博雅善琴倚調製曲有紫霞洞譜傳世時作墨竹自號守齋

楊鉅字子仁嚴陵人自號中齋節度使蕃孫之子尙理宗周漢國公主平居少飲喜觀圖史書學張卽之工丹青墨竹在鄆王員大夫間蘊藉可觀凡畫賦詩其上卷軸印記清致異常用駢馬都尉印

謝堂號恕齋善畫竹梅蘭松石窠木清雅可愛官至樞密使

米友仁字元暉元章之子能傳家學作山水清致可掬略變其父所爲成一家法煙雲變滅林泉點綴草而成不失天真意在筆先正是古人作畫妙處每自題其畫曰墨戲晚年多於紙上作之

廉布字宣仲山陽人自號射澤老農畫山水尤工枯木蘿竹奇石松柏本學東坡青出於藍官至武學博士以張邦昌婿負才不得用子孚亦有父風

王清叔開封人乾道間進士號醒菴學廉宣仲畫枯木竹石臨倣逼真但筆墨龐惡少生意耳官至太府

卿世稱王經略之名特著。

楊補之字無咎號逃禪老人南昌人也祖漢子雲其書姓從子不從木高宗朝以不直秦檜累徵不起又自號清夷長者水墨人物學李伯時梅竹松石水仙筆法清淡閒野爲世一絕。

韓侂胄嘉泰間爲平章太師善作水墨竹石所畫大葉琅玕自稱曰太師竹卷軸上用安陽開國印記俞濬字子清吳興人作竹石得文蘇二公遺意清潤可愛光宗朝任大理少卿寶謨閣待制致仕號且軒晁說之字以道號景迂喜作帶景秋色蘆雁世惟知崔白不知以道尤妙官至侍讀學士

李昭字晉傑鄆城人李文靖之曾孫山水學范寬又善畫花長於墨竹自云他人以蕭疎爲能余以重密

爲巧吾一派不讓文湖州也尤精篆學三墳記

魏變字彥密北人長於水墨梅竹雜畫工詩高宗見而喜之除浙西參議

連鰲字仲舉自號石臺居士精長短句工畫魚幾於徐白紹興年間人

王利用字賓王潼川人舉進士善畫山水長於人物精謹而已亦能書高宗頗愛之官至夔憲

朱敦儒字希眞善畫山水官至浙東憲

江參字貞道江南人形貌清臞嗜香茶以爲生居霅川深得湖天之景平遠曠蕩盡在方寸長於山水師

董源巨然趙叔問居三衢治園築館取楚詞之言名之曰崇蘭嘗與陳簡齋程致道從容其中命貞道爲之圖又令畫史各繪像其上乃賦詩焉

鄭希古河東人長於平畫每出新意輒過人初未甚精紹興初遇郝章於閩州盡得其法

楊簡字敬仲慶元慈溪人師於陸象山喜作墨竹士大夫求者欣然落筆有石本橫枝傳世理宗朝官至寶謨閣學士謚文元人尊稱曰慈湖先生

王會字元叟工花鳥頗拘院體枝葉爪羽窮極微細乾道間官朝請大夫其畫每書毛詩三百篇令和之圖寫官至兵部侍郎

陳容字公儲自號所翁福堂人端平二年進士歷郡文學倅臨江入爲國子監主簿出守莆田賈秋壑招致賓幙無何醉輒狎侮之賈不爲忤詩文豪壯善畫龍得變化之意潑墨成雲噀水成霧醉餘大呴脫巾濡墨信手塗抹然後以筆成之或全體或一臂一首隱約而不可名狀者曾不經意而得皆神妙時爲松竹云作柳誠懸墨竹豈卽鐵鉤鎖之法歟寶祐間名重一時垂老筆力簡易精妙絳色者可並董羽往往贋本亦託以傳

單煥字炳文好古博雅與江白石爲友善書喜寫竹

張端衡鎮江人畫木石有名以進士調句容縣尉

丁權字子卿越人善畫竹自述竹譜

陳珩字用行號此山所翁弟亦善龍水時亦作水墨枯荷折草蟲魚蟹鵠及墨竹極有生意仕朝請郎

艾淑字景孟建寧人號竹坡早游太學善畫竹與陳所翁同舍畫龍俱得名時稱六館二妙仕爲寧波軍節度判官時又有茅汝元舉進士號靜齋善墨梅人以艾竹茅梅爲稱

林泳興化人。鬻齋林希逸之子。善墨竹。自號弓寮。

魯之茂海鹽當湖人。號雪村。畫梅竹。寧宗朝仕爲郎。

王柏字會之。號魯齋。金華人。丞相淮之族事。朱氏門人楊船山。又從何北山。不求聞達。祐間將起之。俄卒。梅竹之妙。不妄與人。世罕知之。

湯正仲字叔雅。江西人。揚補之甥。後居黃岩。號閒菴。開禧年貴仕。善畫梅竹松石。清雅如傅粉之色。水仙蘭亦佳。大抵宗補之別出新意。用湯氏叔雅印。

畢良史字少董。紹興間進士。善作窠木竹石雲龍。能寫唐人小楷。書畫俱妙。

陳虞之字雲翁。號止所。溫州人。咸淳初進士。深於易。作墨竹。每見竹折小枝。就日影視之。皆欲精到。歷官

揚州教授。終奉議郎。

馬宋英。溫州人。放達能詩。父歿。家資日削。至錢唐游淨慈寺。寫古松於壁。題云。磨出一錠兩錠墨。掃出千年萬年樹。月明烏鵲誤飛來。踏枝不著空歸去。丁大全丞相賞其詩畫。急命索之人。忌其能。闕不令出。卒不遇。此誠詩識。作墨梅竹。俱妙。

毛信卿。失其名。溫州人。屢試無成。放意詩酒。畫竹自給。號箕山。杭人得其片幅。轉售於市。輒爭取之。自言大竹畫形。小竹畫意。得法於趙牧之。

裴叔永。字德游。號靜菴居士。其先汴人。徙錢唐。財雄鄉里。建炎間裴節使之孫也。與楊中齋駢馬爲書畫友。善寫蘭竹。窠木怪石。畫上用嘉善堂印。

水邱覽雲杭州臨安人效米元暉作山水逼真又善寫貌。

楊季衡洪都人補之姪畫墨梅得家法又能作水墨翎毛又有劉夢良亦鄉里親黨俱寫墨梅僧超然不知何許人善作山水其峯巒攀頭酷似郭熙至於屋宇林石坡灘水口筆法孱弱與巨然殊不相類今人多以巨然超然連稱莫曉所謂

武道光錢唐人東太乙宮道士善潛補六朝古名畫又能作花鳥窠木竹石  
闕生不知何許人作古木雪景梅花寒鴉凍鵠深得其意

許龍湫江南術士山水師米元暉用筆自成一家設色清潤

左幼山原注一作幻山錢唐景靈宮道士善花鳥山水人物師閻次平

葛長庚閩人自號曰玉蟾嗜酒苦吟善草書畫竹石遊湘潭與葉天谷皆言得道鄂州城隍廟壁林竹是其真跡嘗畫祖師張平叔薛道光及自己像

丁野堂名未詳住廬山清虛觀善畫梅竹理宗因召見問曰卿所畫者恐非宮梅對曰臣所見者江路野梅耳遂號野堂

歐陽楚翁字無塵龍虎山道士善畫山水窠木竹石水墨梅花四時之景尤工畫龍其子雲友亦臻其妙僧梵隆字茂宗號無住吳興人善白描人物山水師李伯時高宗極喜其畫每見輒品題之然氣韻筆法皆不逮龍眠

僧法常號牧溪喜畫龍虎猿鶴蘆雁山水樹石人物皆隨筆點墨而成意思簡當不費妝飾但麤惡無古

法誠非雅玩。

僧月蓬不知何許人。貌古怪。亦不知止宿何地。畫觀音佛像。羅漢天王。得古人體韻。其畫不妄與人。人罕有之。

僧靜賓號白雲。善作異松怪石。如龍騰虎踞。上寫草字。寺院多收。

僧蘿窗。不知名。居西湖六通寺。與牧溪畫意相伴。

僧子溫。字仲言。號日觀。作水墨葡萄。自成一家。法人莫能測。又號知歸子。

僧若芬。字仲石。婺州曹氏子。爲上竺寺書記。模寫雲山以寓意。求者漸衆。因謂世間宜假不宜真。如錢塘八月潮。西湖雪後諸峯。梅天下偉觀。二三子當面錯過。卻求玩道人數點殘墨。何邪。歸老家山。古澗側流蒼壁間。占勝作亭。扁曰玉澗。因以爲號。又建閣對芙蓉峯。號芙蓉峯主。嘗自題畫竹云。不是老僧親寫。曉來誰報平安。

僧仁濟。字澤翁。姓童氏。玉澗之甥。書學東坡。墨竹學俞子清。梅學揚補之。自謂用心四十年。作花圈稍圓耳。山水亦得意。

僧圓悟。閩人。號枯崖。能詩。喜作竹石。

僧慧舟。號一山叟。天台人居西湖長慶寺。能詩。作小篆竹。或二三竿。或百十成林。不見其重複冗雜。僧太虛。江西人。作竹學鄆王楷。

李唐字希古，河陽三城人。徽宗朝曾補入畫院，建炎間太尉邵淵薦之，奉旨授成忠郎，畫院待詔，賜金帶。時年近八十，善畫山水人物，筆意不凡，尤工畫牛。高宗雅愛之，嘗題長夏江村卷上云：「李唐可比唐李思訓。」

劉宗古，汴京人。宣和間待詔成忠郎，畫人物山水佛像。靖康亂流落江左。紹興二年進車輅式，稱旨，復舊職，除題舉車輅院事。其畫人物長於傅明，苗本作成，染不藉脂粉，水墨輕成，但筆致纖弱耳。

馬公顯弟世榮與祖子俱善花禽人物山水，得自家傳。紹興間授承務郎，畫院待詔，賜金帶。世榮二子長曰達，次曰遠，世其家學。

楊士賢宣和待詔，紹興間至錢唐復舊職，賜金帶。工畫山水人物，師郭熙，多作小景山水，林木勁挺，似亦可取。峯石水口雄偉之筆，遠不逮熙。

李迪河陽人。宣和蒞職畫院，授成忠郎。紹興間復職畫院副使，賜金帶。歷事孝光朝，工畫花鳥竹石，頗有生意，山水小景不逮。

李安忠居宣和畫院，歷官成忠郎。紹興間復職畫院，賜金帶。工畫花鳥走獸，差高於迪。尤工捉勒，山水平平。

蘇漢臣開封人。宣和畫院待詔，師劉宗古，工畫釋道人物，臻妙尤善。嬰兒紹興間復官，孝宗隆興初畫佛像，稱旨，補承信郎。其子焯能世其學。隆興畫院待詔。

朱銳河北人。宣和畫院待詔。紹興間復職，授迪功郎，賜金帶。工畫山水人物，師王維，尤好寫驛綱雪獵盤

車等圖形容布置曲盡其妙筆法類張敦禮

李端汴人宣和畫院待詔紹興間復官賜金帶作梨花鳩子得法

張漢宣和畫院待詔畫人物山水師郭熙紹興間復官賜金帶

顧亮宣和畫院待詔師郭熙畫山水人物與張漢同流落江左宮觀寺院畫壁湖口紹興間復職賜金帶

胡舜臣張著俱學郭熙山水與張漢顧亮同門各得熙之一偏亮能作大幅巨軸漢喜布置著畫重山疊巘頗繁冗舜臣謹密雖皆不逮其師然後人亦無及之者

李從訓宣和待詔紹興間復官補承直郎賜金帶工畫道釋人物花鳥位置不凡傳采精妙高出流輩

龐仲宣和百王宮待詔工畫人物絳色山水尤工畫牛紹興間復官補承直郎畫院待詔賜金帶筆法頗

闊次平弟次于皆仲之子能世其學而過之畫山水人物工於畫牛次平彷彿李唐而跡不逮意次于又

次之孝宗隆興初進畫圖稱旨補次平將仕郎次于承務郎畫院祇候賜金帶

吳炳毗陵人工畫花鳥寫生折枝可奪造化采繪精緻富麗光宗李后多愛其畫恩賚甚厚紹興間畫院待詔賜金帶

林椿錢唐人工畫花鳥翎毛師趙昌傳色輕淡深得造化之妙淳熙年畫院待詔賜金帶

趙彥汴人居臨安不入畫院開市鋪畫扇得名作人物山水細碎深遠

蕭照瀘澤人頗知書亦善畫靖康中流入太行爲盜一日掠至李唐檢其行囊不過粉奩畫筆而已叩知

其姓氏照雅聞唐名卽辭職隨唐南渡得以親炙唐感其生全之恩盡以所能授之紹興中補迪功郎  
畫院待詔賜金帶其畫山水人物異松怪石蒼涼古野惜用墨太多書名於樹石間  
周儀宣和畫院待詔善畫人物謹守法度清秀入格承應摹唐畫有可觀紹興年復官賜金帶  
劉松年錢唐人居清波門俗呼爲暗門劉淳熙畫院學生紹熙年待詔師張敦禮工畫人物山水神氣精  
妙名過於師寧宗朝進耕織圖稱旨賜金帶院人中絕品也

李嵩錢唐人少爲木工頗遠繩墨後爲李從訓養子工畫人物道釋得從訓遺意尤長於界畫光寧理三  
朝畫院待詔

賈師古汴人善畫道釋人物師李伯時白描紹興畫院祇候其人物頗得閒逸自在之狀  
王訓成山東人爲人物山水描寫粗惡紹興畫院待詔名餅餚王當時上方所尚蕭李之迹故訓成不得  
志而死

焦錫宣和院人紹興復爲畫院待詔師石恪畫人物

馬興祖河中人賁之後紹興間待詔工花鳥雜畫高宗每獲名跡卷軸多令辨驗  
馬遠興祖孫世榮子畫山水人物花禽種種臻妙院人中獨步也光寧朝畫院待詔  
馬達遠兄得家學之妙畫山水人物花果禽鳥疏渲極工毛羽燦然飛鳴生動之態逼真殊過於遠他皆  
不逮

徐珂蘇漢臣增學婦翁畫人物得其遺意頗能描寫其傳染則不及

梁楷東平相義之後善畫人物山水道釋鬼神師賈師古描寫飄逸青過於藍嘉泰年畫院待詔賜金帶楷不受挂於院內嗜酒自樂號曰梁風子院人見其精妙之筆無不敬伏但傳於世者皆草草謂之減筆

夏珪字禹玉錢唐人寧宗朝待詔賜金帶善畫人物高低醞釀墨色如傅粉之色筆法蒼老墨汁淋漓奇作也雪景全學范寬院人中畫山水自李唐以下無出其右者也

毛松沛人原注一作吳郡崑山人善畫花鳥四時之景

毛益松之子乾道間畫院待詔善畫花鳥小景

王定國汴人隨吳郡王渡江居臨安工寫花鳥師李安忠亦學二崔筆法傅色輕淺清雅不凡後郡王薦

入仕賜金紫

陳居中嘉泰年畫院待詔專工人物蕃馬布景著色可亞黃宗道

白良玉錢唐人工畫道釋鬼神寧理朝畫院待詔子用和輝能世其學寶祐年畫院待詔

王輝錢唐人理度朝畫院祇候畫人物道釋頗工亦能作山水草率嘗用左手描寫遂目爲左手王

李瑛安忠子家傳畫花竹禽獸紹興年畫院待詔

李永年嵩之姪世其家學咸淳畫院祇候

何青年錢唐人善畫道釋人物

陸青師李唐作山水得筆法用墨清秀簡易不凡喜用濃墨木葉不分惟風雨圖最佳紹熙畫院待詔

張訓禮舊名敦禮避光宗諱改今名學李唐畫山水人物恬潔滋潤時輩不可及劉松年師之一說著色青綠如趙千里筆法

趙大亨乃二趙阜隸每供其昆仲研朱調粉遂亦能畫時人以其肥偉目爲趙大漢自恥其俗因就名大亨多畫青綠山水神仙故實

於青年毗陵人嘉定間專畫荷花草蟲世號於荷

馮大有文簡公族孫自號怡齋寓居吳門專畫蓮荷精巧入格

彭呆錢唐人師林椿畫花果寫生

高嗣昌珣之從子師李唐作山水寒林古木嘉定間畫院待詔

韓祐石城人尤善寫生小景花鳥草蟲師林椿染色筆法可並石橋王紹興畫院祇候較之時流畫頗覺

版實

戚仲寶慶年殿司軍士善絳色山水師楊士賢兼畫虎師李迪畫左手書戚仲字多喜作江潮圖扇面

許迪毗陵人專工草蟲師居寧作黃花紫菜青草紅葉精妙入神

楊安道九江人人物山水師范寬筆法有江湖氣韻

林谷成作人物山水樹石平遠秀麗清潤江右多作范寬收藏

牟仲甫隨州人畫猿獐猴鹿與易元吉相似湖廣多有之

李珏從訓子能世其學淳熙畫院待詔

樓觀錢唐人工畫花鳥人物山水學馬遠筆法傳色俱不細潤咸淳年畫院祇候

馬麟遠之子能世家學然不逮父遠愛其子多於己畫上題作馬麟蓋欲子得譽故也爲畫院祇候方椿年錢唐人工畫人物道釋著色山水神仙故實紹定年待詔景定年陸祇候

蘇顯祖錢唐人工畫人物山水與馬遠同時筆法亦相類但筆法稍弱嘉定年畫院待詔俗呼其畫爲沒

興馬遠

朱懷瑾錢唐人寶祐年畫院待詔景定間爲福王府使臣咸淳年賜金帶作人物山水樹木窠石多畫雪

景筆法用墨全師夏珪謹守規矩殊欠瀟灑

孫必達錢唐人善畫道釋鬼神師蘇漢臣淳祐年畫院待詔

俞洪錢唐人師梁楷畫人物山水布景著色逼真但筆法差弱紹定年畫院待詔

毛允昇益之子能世家學景定年畫院待詔

李權錢唐人師梁楷咸淳年畫院祇候

陳清波錢唐人多作西湖全景喬鍾馗喬三教寶祐年待詔

葉肖岩杭人作人物小景類馬遠專工傳寫寶祐間人

馬永忠錢唐人寶祐畫院待詔師李嵩嵩多令代作

豐興祖錢唐人工畫人物山水界畫花禽師李嵩景定畫院待詔

張仲工畫花禽筆法可並林椿寶祐年待詔亦善人物山水

顧興裔錢唐人專師馬和之筆法設色俱不逮淳祐年畫院待詔。

孫覺善水墨白描毛女筆力細巧寶慶年畫院待詔。

陳宗訓杭人師蘇漢臣畫釋道人物仕女描染未精人呼爲鐵陳紹定年畫院待詔。

范安仁錢唐人寶祐畫院待詔善畫魚俗呼范癩子。

夏森珪之子善畫山水筆法用墨不逮其父遠甚。

胡彥龍儀真人善畫人物天神寒林水石窠木描法用大落墨自成一家格法紹定間苗安撫薦入朝爲畫院待詔。

趙芾鎮江人作人物山水窠石江勢波浪金焦二山有氣韻有筆力師古人無院體惜乎僅作一郡之景畫意不遠耳。

魯宗貴錢唐人善畫花竹鳥獸窠石描染極佳尤長寫生雞雛鴨黃最有生意紹定年畫院待詔出入楊駢馬府。

錢光甫原注甫一作普杭人專科畫魚帶景精妙如活可愛景定間畫院待詔。

陳可久寶祐間待詔工畫魚四時花木師徐熙上花下魚筆力意淺用色鮮明。

李章杭人從訓之後善畫人物著色山水。

蘇堅焯之子善畫道釋人物慶元間待詔。

范彬錢唐人善畫人物山水師李權劉朴其弟子也。

陳珏錢唐人號桂岩善人物著色山水寶祐年待詔子琳世其學

崔友諒金陵人善畫道釋人物絳色山水淳祐年馬光祖薦補畫院待詔多作大幅雪景及小簇子劉朴師范彬又師梁楷畫人物子耀世其學

徐道廣杭人號古岩畫花鳥師樓觀景定年待詔

曹正國字良有善畫佛像天神描法入格景定待詔

李德茂迪之子善畫花禽鷹鵠野景不逮其父淳祐待詔

謝昇杭人善畫花竹仕女景定年待詔

顧師顏杭人師李嵩畫道釋人物景定年待詔

史顯祖杭人善畫人物仕女青綠山水端平年待詔

周鼎臣杭人師王輝畫道釋人物

朱玉杭人號柳林朱善畫天神雷部兵將寶祐待詔

張翠峯淮陽人師胡彥龍專畫龍神雷部天將

衛松二趙昆仲皂隸嘗供役使遂多獲其遺稿且熟識其用意傳色制度與趙大亨每倣二趙圖寫皆能亂真

單邦顯吳郡人學千里晞遠畫林木山水則全不然惟花卉蟲蝶粗可彷彿老戴忘其名吳郡崑山人亦學二趙林木山水可追蹤趙大亨衛松花蟲謬甚與單邦顯正相反

趙子雲江西人能作一筆畫凡寫人面及手描畫頗工至衣摺則如草符篆一筆而就蓋不欲蹈襲自成一家耳。

陳善紹興間人學易元吉畫猿獐禽鳥花果頗能逼真傳色輕淡過於林吳。

劉思義紹興間待詔專畫青綠山水拙於布置善於傅色亦不足觀。

朱光普字東美汴人南渡補入畫院學左建畫村田樂及農家迎婦等亦善山水。

朱森銳之弟工山水人物布置行筆俱不逮兄。

楊公傑不知何許人畫小景禽鳥得荒閒之趣。

張紀錢唐人師李迪工畫花竹禽獸不及其師。

朱紹宗工畫人物貓犬花禽描染精邃遠過流輩隸籍畫院。

王宗元不知何許人家居石橋人遂目爲石橋王專學惠崇作池塘小景頗有野趣。

周詢錢唐人工畫界畫樓臺古籍后邱少與人畫故所傳不多。

王友端不知何許人工畫獵犬得其搖尾乞憐之態世不多見亦善花鳥。

秦友諒毗陵人少爲縣吏善畫草蟲其花卉未可言工特於蟬蛻之類傳色輕妙人頗稱之。

李東不知何許人理宗時常於御街鬻明苗本作粥其所畫村田樂常酣圖之類僅可娛俗眼耳。畢生文簡公諸孫寓居吳郡工畫牡丹甚有生意其壻姚亨能繼其業。

僧智叶白描佛像人物。

僧真惠善畫花窠。

僧希白善畫荷花。

聞秀才善畫梅蘭竹石。

員眞字光祖一字勝之金陵人畫墨竹坡石。

吳迪字泰之杭州人畫梅蘭竹石蕭散可喜扁所居室曰惠齋號心玉道人。

陸仲明畫山水窠石。

李思賢畫人物山水。

張思義善畫人物花竹。

閻次安仲子畫山水窠石。

黃益畫山水學夏珪。

王公道畫山水人物小景。

侯守中畫花竹翎毛。

李春畫神佛。

李遵畫人物嘗見有女孝經圖傳世。

孫用和畫道釋人物。

張團練山水人物頗清潤。

李煥畫神佛。

李確白描學梁楷。

徐凱之畫人物窠石。

王用之輝子畫道釋人物。

房歛畫花竹。

徐世榮畫界畫兼工嬰兒。

衛昇畫花鳥甚佳。

夏東叟畫道釋人物。

宋良臣畫花鳥。

黃承務道釋人物兼寫照。

魏道士畫道釋人物。

章程畫人物山水。

呂源畫花禽。

綱兵朱畫山水窠石。

王木畫蕃馬。

夏子文畫山水。

赤目張畫山水師夏珪。

葉森畫山水。

儲大有畫花竹。

楊八門司畫蘭石窠木。

何閣長畫魚。

蔣太尉畫山水窠石梅蘭。

劉門司墨戲。

李苑使墨戲。

張鎡字功父號約齋清標雅致爲時聞人詩酒之餘能畫竹石古木字畫亦工。

毛存杭人父伯益坐韓侂胄黨流嶺表存乃跋涉數千里函骨歸里杭人稱篤孝善墨竹水石如楊中齋

裴德游諸人皆宗之號勿齋人但謂之毛門司。

王介號默菴慶元間內官太尉善作人物山水似馬遠夏珪亦能梅蘭。

劉夫人希字號失傳建炎年掌內翰文字善畫人物師古人筆法及寫宸翰字高宗甚愛之畫上用奉華堂印。

胡夫人平江胡元功尚書女黃尚書由之妻自號惠齋居士精於琴書畫梅竹小景俱不凡時比李易安夫人。

湯夫人叔雅之女趙希泉妻寫梅竹每以父閒菴圖書識其上

翠翹洪內翰侍人失其姓自題云翠翹戲筆字畫婉媚程大昌題詩云戲作風枝斜再惱玉堂宿蘇氏建寧人淳祐間流落樂籍以蘇翠名嘗寫墨竹扶疏旁八分書題如倚雲拂雲之類頗不俗亦作梅蘭

趙士表宋宗室善山水尤喜作墨竹思致如鄆王秀潤過之

羅仲通汴人好畫墨竹頗自珍惜故傳世絕少所作殊精緻但類院體行筆巧妙乏蕭散氣象

李明友字題孺成都人

黃廣字彥暉靖州人

霍适字南仲渭州人俱善畫竹

吳璜延陵人畫竹師文湖州

師永錫蜀人嘗畫老竹枯木

王世英字才仲號頤齋不知何許人效東坡作墨竹

來子章不知何許人作墨竹但葉失之太短

鑑湖隋民云賀方回裔孫名字未詳作平遠細竹瀟灑可喜

尹大夫遺其名高宗朝畫院待詔善墨竹

張茂杭人光宗朝隸畫院作山水花鳥俱精緻小景更佳

趙子厚宋宗室作小山聚竹有思致。

劉浩常州無錫人作窠石人物紹興中人男顯世其業。

劉文惠善畫花鳥

何浩畫花鳥類李迪。

侯必大不知何許人工畫花竹。

陶忠工水墨山水紹興中人。

游昭京口人習山水紹興間人。

李祐之東京人紹興間居臨安寫佛像鬼人明苗本作神尤工牛馬。

左建西京人用逸筆畫村田樂。

田宗源字子濟東京人習范寬山水尤工雜畫後居金陵。

周珏專畫水紹興中人。

時光大名人習賀真山水筆蹟細碎喜作短松怪石密林芳樹後居鎮江男建亨小字烏郎亦能畫執煥紹興中殿前使臣工畫人物故實。

張鑑字季萬北人後居滁州水口善草書尤工山水得破墨法。

呂元亨金陵人工花鳥。

林俊民紹興畫院待詔習范寬山水。

祝次仲字孝友太末人工山水尤善草書  
徐本工雜畫紹興間人

黃庭浩工人物

武克溫上京人紹興間工蕃馬

陸琮工山水蕃馬學田宗源

毛文昌工田家風俗

陳廣宣城人習徐白魚水

睢世雄工魚水

施義金陵人習李唐山水

周白平之曾祖工山水

董琛金陵人習施義山水

劉興祖工花鳥師江伯清後習韓祐

熊應周金陵人習小米山水兼工花鳥

陸懷道通州人習田宗源山水作濺灑出而無源流而不散

毛政廬江人工神佛及山水

趙君壽臨安人工傳寫及仕女

趙賓王鄂渚人工傳寫。

萬濟工墨竹。

宋永年臨江人後居金陵善寫梅。

趙山甫京口人淳熙中習老米山水。

王洪龍祥俱蜀人習范寬山水。

陳禧金陵人乾道中工雜畫。

何世昌淳熙畫院人工花鳥。

陳椿杭人習郭熙山水乾道間祇應甲庫。

徐世昌石城人本之從子工花鳥。

魯莊杭人工人物乾道間祇應脩內司。

徐京宗馬遠山水。

王安道宗李迪花鳥。

林彥祥紹興間人嘗臨盧鴻草堂圖小米跋其後。

衛光遠畫花鳥師李迪。

曹瑩畫花鳥師李迪。

周左山水人物師周儀。

陳左仕女宗陳宗訓。

梁松隸畫院師。賈師古描寫飄逸，青過於藍。

李公茂安忠之子。世其家學，然不逮父。

宋碧雲景定間畫院待詔。善人物、花竹翎毛。

吳俊臣江南人。淳祐間畫院待詔。善人物、山水。多作雪景。師朱銳。

王曾字孝先。封沂國文正公。昭陵名臣。書畫皆合格。

吳瓊益王子琚之弟。工畫竹。

翟汝文字公巽。潤之丹陽人。紹興初參知政事。嘗自畫佛道像六十餘軸。及著色楚天春曉圖。藏於家。

湯叔周乃叔雅之弟。亦工墨梅。

紫微劉尊師。僞齊豫之孫。工山水人物。

趙師舉字從善。千里之姪。善花。

曹申甫工木石風竹。與梵隆爲畫友。

王華景祐間畫院待詔。工花鳥。

包棗宣城人家。世畫虎能紹其業。

盛師顏金陵人。工雜迹及道釋像。仕女疑面。每用北螺青或烟墨水淡開。謂之青蛾粉白。有一種富貴氣象。

牟益字德新，理度朝人，畫入能品。

僧德止號清谷，工畫，嘗畫廬山尋真觀二壁，朱文公題其上。

張翼字性之，號竹林，金陵人。初學畫於明彥龍，成於盛師顏。人物道像雜迹外，尤工逸筆。居杭時，嘗爲巨璫羅大節作導引四圖，各系以自製小讚。羅上直時，張於直舍中，理宗顧見之曰：「此畫極工緻，可於閣下開版，竟不問誰筆？」其運窮不偶如此。

顏直之字方叔，號樂閒，吳郡人。善小篆，工畫人物。

金

顯宗章宗父，畫獐鹿人馬，學李伯時墨竹，自成一家。雖未臻神妙，亦不涉流俗。章宗每題其籤，海陵煬王完顏亮嘗作墨戲，多喜畫方竹。

完顏璣字仲實，號樗軒，封密國公。家藏法書名畫，幾與中祕等。喜作墨竹，自成規格，亦甚可觀。

王庭筠字子端，號黃華老人，遼東人大定中進士官至翰林脩撰，善山水古木竹石，上逼古人。論者謂胸次不在米元章下。尤善草書，曼慶子。

王曼慶字禧伯，號澹游，善墨竹樹石，絕佳。亦能山水，然不迨墨竹。官行省左右司郎中，任詢字君謨，號南麓，易州人。草書入能品，山水亦佳，在王子端下。

李澥字公渡，相州人，能行書，工畫山水。

龐鑄字才卿，號默翁，大興人。明昌進士，官至京兆轉運使，善山水禽鳥。

李邁字平甫號寄菴樂城人明昌進士官至東平府治中善山水嘗爲元裕之畫繫舟山圖得前輩不傳之妙龍虎亦佳

李仲略字簡之大定進士官至山東按察使畫山水嘗臨米元章楚山圖

劉謙光甫父號明別本無號字東軒工畫山水

王競字無競彰德人官至翰林承旨善大字作墨竹亦古怪

虞仲文字質夫武州定遠人善畫人馬墨竹學文湖州官至平章封秦國公

趙秉文字周臣號閒閒瀋陽人官至翰林學士書效鍾王畫梅花竹石筆力雄健命意高古

蔡珪字正甫丞相松之子畫墨竹學文湖州官至濰州守

張汝霖字仲澤遼陽人畫墨竹師黃華官至平章

耶律履字履道契丹人東丹王七世孫官至尚書右丞善畫鹿作人馬墨竹尤工

耶律浩然工山水

韓將軍未詳其名善墨竹

馬天驥字雲章介休人能畫作小竹石瀟灑可喜弟雲卿雲漢皆善畫

陳道輔京兆人好寫墨竹自號夜江散人

謝宜休妻遺其姓氏小字阿環山水學李成精妙合格竹學王華亦可觀  
武元直字善夫明昌名士能畫有巢雲曙雪等作

李元素

趙霖

周濟川並善畫

喬夫人工墨竹

李早工畫人物甚佳樹石不稱明昌間人張翰林翥嘗題其三馬圖云金原六葉全盛年明昌政似宣和前寶書玉軸充內府時以李早方龍眠

武伯英嶧縣人進士官至觀州同知善畫

劉器之祁陽人以墨竹得名兼精小景

張公佐并州人工山水明昌泰和間推爲獨步

大簡之渤海人工松石小景

錢過庭畫山水以米老楚山清曉圖爲法

段志賢工畫龍

徐榮之工花鳥

李仲華善畫湍流高樹

李漢卿東平人工草蟲

黃謁精蕃騎嘗見雪獵圖題大金國御前應奉黃謁

胡先生又號胡叟不知何許人。工山水。

杜文字莘老。雲中人。工山水。

張珪正隆中人。工人物。

重陽真人王壽字知明咸陽人大定中得道登真其初度馬丹陽夫婦日嘗畫骷髏天堂二圖并自得真及作松鶴圖與史宗密真人。

僧元悟禪師能詩書墨竹學樗軒。

僧歸義工山水。

龍門公善墨竹。

隱秀君善山水。

卷五

元朝

趙孟頫字子昂號松雪道人宋宗室居吳興官至翰林學士承旨贈江浙行省平章政事封魏國公謚文敏。榮際五朝名滿四海書法二王畫法晉唐俱入神品。

趙雍字仲穆文敏子官至集賢待制同知湖州路總管府事畫山水師董源尤善人馬書篆俱精妙子鳳字允文畫蘭竹與迺父亂真集賢每題作已畫以酬索者故其名不顯麟字彥徵以國子生登第今爲

江浙行省檢校善畫人馬。

李衍字仲賓號息齋道人薊邱人官至江浙行省平章政事致仕封薊國公諡文簡善畫竹石枯槎始學王澹游後學文湖州著色者師李頗馳譽當世。

李士行字遵道文簡子官至黃岩知州畫竹石得家學而妙過之尤善山水。

商琦字德符曹南人左山參政第七子官至集賢學士山水師李營邱得用墨法墨竹自成一家亦有妙處。

商璣字台元左山之姪司業台符之弟自號遜齋安恬不仕喜畫山水得破墨法窠石最佳。

劉融字伯熙薊邱人官至祕書卿善畫山水師郭熙。

柯九思字敬仲號丹邱生台州人官至奎章閣鑒書博士博學能文喜寫墨竹師文湖州亦善墨花。

王振鵬字朋梅永嘉人官至漕運千戶界畫極工緻仁宗眷愛之賜號孤雲處士。

周密字公謹號草窗歷山人居錢唐宋寶祐間爲義烏令家藏名畫法書頗多善畫梅竹蘭石賦詩其上。

鄭思肖

字所南福州人工畫墨蘭嘗自畫一卷長丈餘高可五寸許天真爛漫超出物表題云純是君子絕無小人。

金應桂字一之號蓀壁錢唐人在宋爲縣令歸附後隱風篁嶺書法歐陽率更畫學李龍眠嘗作岩居上真出塵觀音刻石。

錢選字舜舉號玉潭霅川人宋景定間鄉貢進士善人物山水花木翎毛師趙昌青綠山水師趙千里尤

善作折枝。其得意者自賦詩題之。

龔開字聖與。號翠岩。淮陰人。宋景定間兩淮制置司監當官。作隸字極古。畫山水師二米。畫人馬師曹霸。描法甚麗。尤喜作墨鬼鍾馗等畫。怪怪奇奇。自出一家。

沈孟堅。畫花鳥師錢舜舉。往往逼真。

上正真。先名纘。字承之。號竹齋。又號筠溪。杭人。以宋內侍奉謝后北觀。受命佩虎符。一旦辭入道。工山水墨竹。學毛勿齋。

趙孟頫。字子俊。文敏弟。官至知州。畫人物花鳥頗佳。

陳琳。字仲美。珏之次子。善山水人物花鳥。俱師古人。無不臻妙。見畫臨模。咄咄逼真。蓋得趙魏公相與講明。多所資益。故其畫不俗。論者謂宋南度二百年。工人無此手也。

劉敏。字有功。宣德龍門縣人。賜號龍門居士。自號年豐老人。善畫墨竹。學顧正之。有風烟夕翠圖傳於世。子世亨。字嘉甫。亦善墨竹。

史杠。字柔明。號橘齋。道人。官至行省左丞。讀書餘暇。弄筆作人物山水。花竹翎毛。咸精到。

郭敏。字伯達。杞縣人。幼讀書。長好丹青。工畫人物山水。喜武元直畫師其意。不師其法。至於花卉墨竹。亦各臻妙。官至州倅。

李有。字仲方。先名立義。燕人。官至兩浙運司經歷。善古木竹石。筆意高遠。作者推服。

喬達。字達之。燕人。官至翰林直學士。善丹青。山水學李成。墨竹學王庭筠。後更學文同。

王英孫字才翁號脩竹紹興人宋將作監簿入朝隱居不仕作墨竹蘭蕙頗雅潔不凡

李倜字士宏號員嶠真逸官至集賢侍讀學士喜作墨竹宗文湖州

田衍字師孟彰德人性穎異博識多藏古法書名畫墨竹學王澹游頗得雅趣

張衡字士衡樂陵人爲中書左司員外郎辭門苗本作閒屢辟不起作文字務奇古書學張長史苗本脫

史字山水學荆關墨竹不師古人自成一家

顧正之不知何許人善墨竹學樂善老人有酷似處人莫能辨

范庭玉保定人善墨竹師樂善老人筆法

劉貫道字仲賢中山人工畫道釋人物鳥獸花竹一一師古集諸家之長尤高出時輩亦善山水宗郭熙

佳處逼真至元十六年寫裕宗御容稱旨補御衣局使

柴楨字君正東平人自號適齋善畫山水才思天賦不習而工

信世昌字雲甫東平人自號中隱善畫山水學於沈士元有出藍之譽墨竹別成一家蓋黃華之後又一

變者也

李章字君章東平人善書晚年畫墨竹有高致

胡瓊字元禮京兆人官至衡州路同知善丹青墨竹

韓公麟字國瑞號雪谷真定人爲太醫副使善養生之學留情翰墨喜寫竹筆意簡當殊有生意

牛麟字伯祥太原人初業詞賦作大字畫墨竹意度蕭散

張德琪字廷玉燕中豪家讀書樂道行書學劉房山草書學張長史畫墨竹梅花竹學王澹游有佳趣。

劉德淵字仲淵燕人官至藍山縣尹墨竹學劉自然。

韓紹暉字子華燕人官至御衣局使畫山水學武元直墨竹學樂善老人。

張敏夫燕人喜畫墨竹學顧正之。

高吉甫燕人喜畫竹石宗劉自然亦無大過人者。

趙淇潭州人宋趙葵之仲子號平遠又號太初道人故合而曰平初又云靜華翁官至湖南宣慰使作墨竹長竿勁節風致甚佳。

周堯敏字禹卿號學山海鹽當湖人畫竹宗文湖州頗有得處。

王鼎字德新海鹽人好寫竹學丁子卿深悟筆意子泰之號竹趣能紹父業。

謝顯字耀卿號隱麓大名人畫墨竹宗員大夫原注員一作尹

劉廣之燕人善寫墨竹。

宋敏字好古善墨竹。

沈雪坡嘉興魏塘人好寫梅竹。

姚雪心台州黃岩人畫墨竹宗文湖州。

趙雲岩溫州人寓華亭青龍鎮喜作花鳥設色有法亦善墨戲墨竹喬戚里名字出處未詳畫梅竹石建安白鶴山巖祠東廡中壁有其畫。

王仲元不知何許人專門花鳥尤善作小景得用墨之法溫潤可喜。

自然老人姓劉氏遺其名真定祁州人兵後居燕工畫墨竹禽鳥。

牛老大名人自少居市廛間作絲絹牙郎號窩絲牛能畫墨竹得於巧性不師古人亦粗可觀朱淳甫濟陰人居曹之樂平坊世業丹青山水人物樹石俱精亦寫梅竹有佳致。

焦善甫燕人工雜畫花竹人物尤長寫貌。

陳仲仁江右人官至陽城主簿善山水人物花鳥爲湖州安定書院山長日與趙文敏論畫法文敏多所不及後見其寫生花鳥含豪命思追配古人嘆曰雖黃筌復生亦復爾耳其見重如此。

顏輝字秋月江山人善畫道釋人物。

孫君澤杭人工山水人物學馬遠夏珪。

吳梅山工山水人物。

吳梅溪工花鳥雜畫。

馮君道錢唐人畫花竹翎毛性酷嗜鵝鴨每袖養之觀其飲啄以資畫筆。

楊月澗畫花鳥龍虎。

楊說岩畫道釋尤工寫貌。

馬虛中善畫花鳥山水。

許擇山工畫神佛。

沈月田工畫林木樹石。

朱梅間善畫花竹。

劉耀字耀卿朴之子畫山水學馬遠夏珪。

吳古松杭人山水學郭熙。

王淵字若水號澹軒杭人幼習丹青趙文敏多指教之故所畫皆師古人無一筆院體山水師郭熙花鳥

師黃筌人物師唐人一一精妙尤精墨花鳥竹石當代絕藝也。

朱德潤字澤民吳郡人官至征東儒學提舉畫山水學郭熙其合作者甚佳。

唐棣字子華吳興人官至休寧縣尹畫山水學郭熙亦可觀。

黃公望字子久號一峯又號大癡道人平江常熟人幼習神童科通三教旁曉諸藝善畫山水師董源晚

年變其法自成一家山頂多岩石自有一種風度。

曹知白字貞素號雲西華亭人畫山水師馮迥筆墨差弱而清氣可愛有僕夏汲清亦能畫。

吳鎮字仲圭號梅花道人嘉興魏塘鎮人畫山水師巨然其臨模與合作者絕佳而往往傳於世者皆不

專志故極率略亦能黑竹黑花。

倪瓈字元鎮號雲林生常州無錫人畫林木平遠竹石殊無市朝塵埃氣晚年率略酬應似出二手

盛懋字子昭嘉興魏塘鎮人父洪甫善畫懋世其家學而過之善畫山水人物花鳥始學陳仲美略變其

法精緻有餘特過於巧。

孟玉潤吳庭暉皆吳興人畫青綠山水花鳥雖極精密然未免工氣同時有姚彥卿亦能畫王士熙字繼學東平人官至御史中丞善畫山水

賈策字治安中州人嘗爲杭仁和尹畫花竹禽鳥得其飛鳴翔集之狀

顧安字定之不知何許人嘗任泉州路判官善畫墨竹

陶復初字明本號介軒老人天台人官至台州儒學教授贈樂清尹師李薦邱父子畫墨竹及著色竹甚工亦能山水

李寘嶠河東人官至翰林學士善畫墨竹

謝庭芝字和仲號雪村平江崑山人善畫墨竹

李升字子雲號紫寘牛濠梁人畫墨竹亦能窠石平遠

盛昭字克明揚州人竹石師文湖州

郭畀字天錫京口人畫竹石窠木

蘇大年字昌齡號西坡真定人居揚州竹石師蘇東坡窠木師廉仲宣

張遜字仲敏號雲溪吳郡人善畫竹作鉤勒法妙絕當世山水學巨然則不逮竹

顧達一名達字周道中吳人畫山水人物并能寫貌

口惟志字彥功號恕齋大梁人官至集賢待制江浙儒學提舉善墨戲

邊魯字至愚號魯生善畫墨戲花鳥

陳君佐宿州人居揚州山水師馬遠夏珪墨戲師徽廟

李容瑾字公琰畫界畫山水師王孤雲

林士能字若拙畫山水無渾厚秀潤之氣

朱裕字敏道延陵人畫山水師李成

沈麟字秋澗杭人畫山水學郭熙兼能寫貌

鄭禧字熙之吳郡人善墨苗本作畫山水學董源筆法用墨清潤可喜畫墨竹禽鳥全法趙文敏惜乎夭折

王蒙字叔明吳興人趙文敏甥畫山水師巨然甚得用墨法秀潤可喜亦善人物

趙元字善長山東人畫山水師董源

張義上字師夔善畫山水

陳植字叔方吳郡人畫樹石甚有意趣

李士傳字仲芳薊邱人畫山水人物學李伯時尤善摹徽廟墨戲

戴淳字厚夫錢塘人善畫山水

杜本字原父畫墨牛葡萄甚可觀亦善山水

吳垕字從禮杭人臨摹院畫咄咄逼真

張渥字叔厚號貞期生杭人善白描人物筆法不老無古意

王冕字元章會稽人能詩善畫墨梅萬蕊千花自成一家凡畫成必題詩其上吳瓘字瑩之嘉興人多藏法書名畫能作窠石墨梅學楊補之頗有清趣

張文樞字石隱湖州德清人幼嘗爲僧能畫山水學巨然亦善墨竹

李沖字用之善畫山水學李成荆浩

張遠字梅岩華亭人善畫山水人物學馬遠夏珪至於潛補古畫無出其右臨亦能亂真陳鑑如居杭州精於寫神國朝第一手也其子芝田能世其業

佟士明居上都以寫貌得名

冷起畧居京師工傳神至正間嘗寫御容稱旨

王繹字思善杭人善寫貌尤長於小像不徒得其形似兼得其神氣

林伯英嘉興魏塘人工畫花鳥師樓觀

周如齋杭人畫山水學高房山

沈月溪華亭青村人以稜作爲業畫山水人物學馬遠往往亂真人莫能辨

邊武字伯京京兆人善墨戲花鳥

王迪簡字庭吉號蕺隱越人善畫水仙

陶鉉號菊村金陵人畫山水師李成

謝佑之居都下善畫折枝傅色差厚蓋欲倣趙昌而未能升堂者

劉夢良蜀人畫梅花宗楊補之。

朱邱蜀人善畫竹木。

簡生蜀人善畫山水。

陳立嘗畫龍眠山圖虞先生集題之。

華岳善山水楊先生載詩云華岳能詩世有名學畫丹青亦疏放。

潘桂金陵人宋末張翼孫婿也善寫貌。

何大夫工畫人馬虞先生詩云國朝畫手何大夫親臨伯時閱馬圖  
瞿元鎮規模董北苑米南宮父子寫山水雲物殊有標致。

王起宗善畫山水樹石。

戈叔義善畫墨竹。

臧良字祥卿錢唐人畫花竹翎毛師王若水。

夏迪字簡伯溫州人畫山水竹石。

趙天澤字鑑淵蜀人畫梅竹。

張中字子正松江人畫山水師黃一峯亦能墨戲。

衛九鼎字明鉉天台人畫界畫師王孤雲。

徐愷字士元湖州南潯鎮人畫山水師李成。

曾瑞卿號褐夫居錢唐工畫山水學范寬。

張觀字可觀松江楓涇人世業稜作畫山水學馬遠夏珪特長於模倣。

趙清澗淮人工畫人物仕女。

楊基字孟載蜀人居平江畫山水竹石。

高克恭字彥敬號房山其先西域人後居燕京官至刑部尚書善山水始師二米後學董源李成墨竹學黃華大有致怪石噴浪灘頭水口烘瑣潑染作者鮮及。

伯顏不花高昌世子而鮮于伯幾之甥號蒼岩官至江東廉訪副使工畫龍。

亦蓋君實女真人居燕城畫竹學劉自然頗有意趣。

蕭鵬搏字圖南本契丹人父榮甫王子端之甥圖南幼有巧思博學多能詩書畫三事皆追蹤黃華尤長於山水亦喜墨寫梅竹。

丁野夫回紇人畫山水人物學馬遠夏珪筆法頗佳。

宋汝志錢唐人宋景定年畫院待詔歸附後爲開元宮道士號碧雲善畫人物山水花鳥師樓觀天師張與材字國梁號薇山別號廣微子封留國公居信州龍虎山能大字畫竹與龍。

天師張嗣成號太玄能畫龍亦嘗見其所畫廬山圖。

天師張嗣德號太一畫墨竹禽鳥。

道士方方壺居上清宮畫山水極瀟洒無塵俗氣。

道士吳霞所居龍虎山善畫龍。

六一道士張彥輔多居京師善畫山水。

道士趙元靖不知何許人浪游閩浙間以墨竹有名所至淋漓牆壁雖頗近繁重亦有可觀。

道士丁清溪錢唐人工畫道釋人物師李嵩王輝馬麟尤善寫貌。

道士王景昇杭人居開元宮善畫道釋人物學王輝李嵩。

道士徐太虛不知何許人善畫山水。

道士蘆益修天台人善畫水仙學趙子固。

道士蕭月潭淮人善白描道釋人物。

宗師溥光字元暉號雪菴俗姓李氏大同人特封昭文館大學士賜號元晤大師善真行草書亦善畫山水學關仝墨竹學文湖州俱成趣。

頭陀溥圓字大方號如菴俗姓李氏河南人於雪菴爲法弟書學雪菴山水墨竹俱學黃華。

僧海雲墨竹學樗軒。

僧妙圓墨竹頗有法度。

僧智浩號梅軒墨竹雖少蘊藉洒脫簡略得自然趣。

僧道隱字仲孺號月澗俗姓李氏海鹽當湖人蘭石學趙子固墨竹宗王翠岩

僧允才號雪岑受業嘉興石佛寺墨梅竹似丁子卿

僧時溥字君澤號雨岩華亭人居奉賢鄉接待寺通經律作詩亦畫墨竹三梢五葉而已

僧智海居燕中喜畫墨竹學海雲禪師

僧明雪窗畫蘭柏子庭畫枯木菖蒲止可施之僧坊不足爲文房清玩

管夫人道昇字仲姬趙文敏室贈魏國夫人能書善畫墨竹梅蘭

劉氏不知何許人孟運判室號尙溫居士能臨古人字逼真喜吟小詩墨竹效金顯宗亦粗可觀

蔣氏汴人完顏用之室嫠居以清淨自守好作墨竹

張氏喬德玉室善寫竹

#### 外國

日本國古倭奴國也有畫不知姓名傳寫其國風物山水設色甚重多用金碧然殊方異域而能留意繪事亦可尚也至今倭僧多能作墨畫觀音佛像

高昌國畫用金銀箔子及朱墨點點如雨銷酒紙上畫翎毛如中國花卉亦佳

夏國英宗元昊通蕃漢文字善繪畫

西蕃畫佛像多畫於布上作奇形詭狀上用油油之

高麗畫觀音像甚工其源出尉遲乙僧筆法流而至於纖麗

補遺

宋

宗少文南陽人文帝朝徵不起妙善書畫。

齊

宗測字敬微一字茂深宋徵士少文孫明帝徵爲司徒主簿不就善畫。

毛惠秀善畫武帝欲北侵使畫漢武北伐圖。

劉瑱字士溫官至義興太守爲當世所稱尤長於婦人。

毛惠遠滎陽人善畫馬與劉瑱同時並爲當世第一

殷喬陳郡人善寫人與真不別。

梁

南郡大連字仁靖簡文帝子善丹青。

蕭賁字文奐齊武帝曾孫官湘東王法曹參軍善畫。

後魏

王由字茂道官至東萊太守善書畫。

唐

李從儼.岐王茂貞子.工書畫官至鳳翔節度使.

田宏正.工丹青.尤善圖人形表.官至魏博節度使.

梁令瓊.或云蜀人.開元中工畫人物.宋祕閣有五星二十八宿真形圖一卷.李伯時云.甚似吳生.倪麟.開元中集賢畫直工人物.

陳子昂.工畫人馬.

楊岫之.大歷中工鬼神.

周助.工佛像.

修處士.工花鳥.

李翹.工花鳥.

桓言.桓駿.皆善屋木.

周邁.工人馬.

令元素.工古仙事迹.

于邵.以德宗誕日.進自畫松竹圖.

李方叔.元和中.工山水人物.自號西河山人.

宋之望.善傳寫.

祁岳.項洙.范山人.並工山水.

杜宗河南人。工佛經變像。

李察張昱並善畫鷄。

章叔方進士也。工畫馬。

梁司馬工畫馬。

元俊善畫牛及山坡草野之景。

盧珍爲內供奉。工人物及佛經變像。

陳庶揚州人。師邊鸞花鳥。尤善布色。

裴遼善鶯鶯并牛。

崔希眞鍾陵人。精繪事。

侯造工折枝并牛。

杜秀才善畫牛。

李紹工花鳥。

張桂西川人。工雜迹。

李奉珪樊守素俱善人物。

李約善畫梅。

五代苗本誤作岱。

胡嚴徵，晉天福間工神佛。

王畊，吳越人善畫尤工牡丹。

黃惟亮，筌之子。畫亦如其父兄。人鮮知者。  
成處士，江南人善寫真。

宋

欽宗以徽宗元子漸染聖藝。亦精繪事。居東宮日嘗畫唐十八學士圖。以賜官僚。張叔夜。豫章天台皆有刻本。

仁懷皇后朱氏。欽宗后也。學米元暉著色山水甚精妙。畫上有印曰朱氏道人。

趙令曄。字景升。封嘉國公。師李伯時。善畫馬。

高彥寔。開封人。畫佛像學吳道子。

錢昆。字裕之。吳越王俶之子。歸朝仕至祕書監。自畫寒蘆沙鳥於紈扇。人競藏之。

錢仁熙。武肅諸孫。頗讀書。善丹青。尤工水牛。多寫於紈扇上。人爭傳之。歸朝歷信泰光三州倅。

錢易。字希白。廢王第十二子。歸朝仕翰林。僕值而卒。自畫十六羅漢極古怪。

錢鏗。字輔軒。武肅第五子。善丹青。

徐兢。字明叔。歷陽人。以廕補官。善山水人物。宣和中使高麗。撰圖經四十卷。行於世。

黃伯思。字長睿。閩人。政和間終祕書郎。嘗模顧愷之桓溫像。閻立本文會圖。惟不出己意。

鄭天民字先覺宣和中爲郎官山水師巨然。

趙廉東都人工山水宣和末甚得幸。

胡錫錢唐人豐熙間以道釋像得名。

王延嗣國初工鬼神。

申屠亨畫山水宗黃筌。

江惟清工佛道人馬。

李象坤工佛道人馬鬼神。

譚宏成都人工花果。

曹訪畫柳塘家鵝學徐熙。

陳文頊泉州仙遊人頗知書亦工畫。

高述丹陽人學東坡書及竹石皆逼真。

秦湛字處度少游子善著色山水。

李咸熙王崇國初同時工人物。

道士楊世昌字子京武都山人與東坡游善山水。

邢敦字君雅隱居雍丘真宗詔爲許州助教辭工畫。

王述善羅漢學盧楞伽。

宋純花果染色極似趙昌。

靳青號野處絳之驛卒也遇異人得道畫貓能逼鼠。  
曾達臣號歸愚居士江西人工草蟲。

任撫幹不知何如人工山水。

譚季蕭畫水墨梅竹絕清潤坡石亦佳。  
道士朱大洞錢唐人山水人物宗廟照。  
王鼎北人善人物仕女山水宗徽廟頗粗俗。  
王珏北人善花竹翎毛學馬賈。

張萬成花鳥宗林椿。

周吉言仕女宗李嵩。

徐改之山水學李唐。

李次山工山林人物。

白思恭工畫神佛。

時叔遠道像人物亦可取。

劉古心工梅竹烏雀。

寇君玉工蟹。

張師錫工花竹禽鳥。

徐皋乃白之族工魚。

任生建康人工仕女。

吳隱之工仕女。

胡良史工山水。

宋京工山水。

戚化元毗陵人家世畫水化元兼工魚龍。

董常嘉興人人工道釋像筆力細而勁拔。  
馬隱東都人畫花師刁光胤工而不化。  
龍升善小景花竹山水學夏珪馬遠。

張敏叔工花木。

盧象先工道釋人物。

李鬱平陽人人物精贍。

許中正蜀人人工鬼神及龍。

郭煥邠州人善楊寫。

劉漢卿工山水。

張德新善花鳥。

謝大昌嘉興人工平畫。

白昌華亭人工平畫。

李友直工山水。

李益渭州人工畫。

彩郎中河南人工畫。

劉允文廣漢人工佛像。

陳揚吳真孫玠並工雜述。

曹虛白張咸熙皮闌並工畫。

賀六待詔海州朐山人家世專畫觀音。至其身於藝尤工。忽觀音化爲丐者求畫。遂得真相。其名益彰。

危道人不知其名住麻姑山。蓋有道者工畫魚。

周弼字伯彩汝陽詩人善墨竹。

□斌工江潮。

□敏行彭州人工佛像。

僧修範潤州人工湖石。

僧志堅蜀人工山水。

僧彥深工佛像尤精觀音。

僧明川工山水。

遼

義宗諱倍小字圖欲太祖長子幼聰敏好學善畫本國人物如時騎雪獵千鹿圖皆入宋祕府耶律題子字勝隱官至西南面招討都監嘗從北院樞密使侵宋宋將有因傷而仆題子繪其狀以示宋咸嗟神妙。

耶律寢字德隣官至太子太師風神秀爽工於畫。

陳升聖宗翰林待詔嘗奉詔寫南征得勝圖。

元

李希閔字克孝薊丘人畫山水竹石。

趙彥正仲穆姪工畫人馬。

僧維翰字古清江右人畫龍學所翁。

續編

皇明

宣廟御筆有山水有人物有花果翎毛有草蟲上有年月及賜臣名寶用不一有廣運之寶武英殿寶等

寶雍熙世人等圖書臣仰惟宣廟臨御當重熙累治四海無虞萬幾之暇留神詞翰於圖畫之作隨意所至尤極精妙蓋聖能天縱一出自然如化工之於萬物因物賦形不待矯揉而各遂生成也臣謹識憲廟孝廟御筆皆神像上識以年月及寶宗室中善寫神像及金瓶金盤牡丹蘭菊梅竹之類舊家多有珍藏者

郭文通永嘉人善山水布置茂密長陵最愛之有言馬遠夏珪者輒斥之曰是殘山剩水宋僻安之物也

原注文通之遭際竹軒徐以道先生嘗言之水東日記亦載之

商喜字惟吉善山水人物超出衆類際遇累朝士林多重之今孫祚字天爵能世其學

韓秀實涿州人與商惟吉同被寵渥人物亦佳尤喜畫馬

張靖山東人道釋人物得吳道子之奧尤善寫照

孫玘字庭□曾孫錦字大紳俱能山水人物寫照有其祖之妙

殷善字從善金陵人花果翎毛極清致子偕字汝同專其業

邊景昭隴西人及子楚祥花果翎毛工緻過殷氏

謝庭循永嘉人山水爲同事所宗東里楊少師稱其清謹有文尤精繪事是以獨見重於宣廟非他臣所能及

周文靖莆田人山水堪配庭循

王紱字孟端號友石生又號九龍山人毘陵人高介絕俗書法詩文皆出羣任中書舍人有王舍人詩集

行於世畫竹石絕倫名馳天下不輕與人故人不可苟得也。

莊瑾字公瑾號采芝龍江人爲人雅淡高致能詩善草書尤長於畫師法夏珪馬遠蓋張可觀以後一人而已。

僧溫日觀妙於葡萄無不知其名者。

胡大年僧曉菴皆工葡萄。

李在字以政莆田人遷雲南行取來京山水細潤者宗郭熙豪放者宗夏珪馬遠其人物評者謂八面生動故四方重之。

戴進字文進號靜菴又號玉泉山人錢唐人山水得諸家之妙神像人物走獸花果翎毛極其精緻喜作葡萄以配以鈎勒竹蟹爪草奇甚真畫流第一人也子泉字宗淵山水得家傳但用墨太重耳。

夏芷字庭芳錢唐人從游戴靜菴克勤於學筆力逼其師不幸早卒弟葵字庭暉山水人物皆工緻華朴中浙中詩僧師戴靜菴作畫得名。

上官伯達譙川人神佛人物傅色旣精神彩亦備能使人起敬。

夏景字仲昭初姓朱登第後始改正爲夏東吳人自中書舍人累進太常寺卿直內閣詩文書法皆妙喜作竹石求者無虛日一一應之得之者寶藏。

張益字士謙與仲昭同郡同登第官至學士寫竹尤奇仲昭士謙皆師事之。

陳嗣初東吳人以文章擅名翰林任檢討寫竹尤奇仲昭士謙皆師事之。

謝宇字伯寬號容菴湖廣衡陽人幼聰穎宣德中欽選司禮監與同中貴讀書以中書舍人直內閣累進工部左侍郎掌通政司事山水法諸大家花木鳥獸無不能者皆到妙處仲子中書舍人汝明字晦卿號東麓亦善山水

任道遜字克誠瑞安人詞翰皆佳官至太僕寺卿直文華殿善寫梅夫人孫氏亦能夫人之父任太守寫梅得名人以孫梅花稱之

夏衡字以平松江人工書法篆隸高古自中書舍人進太常寺卿作畫有黃子久之妙

金文鼎鶴城人工書法詩文流麗畫得黃子久筆意子鈍字汝厲銳字汝潛並有父風致

金湜字本清號朽木居士四明人善書法任中書舍人寫竹石甚佳其鉤勒竹尤妙官至太僕

陳謙字士謙號訥菴逸人書畫皆學趙松雪自誇體貼評者亦許其有六七分妙云

丁文暹號竹坡善山水翎毛筆力清勁

陳叔謙武林人苗本無人字玩古器識名畫其價直纖毫不爽作畫學倪雲林亦妙嘗書一聯於庭以自

况博古圖蒐周漢制無聲詩寫晉唐題

王尙賢梅溪人善戲墨人物年至九十下筆益妙

姚綬字公綬號雲東逸史浙人由進士仕至監察御史有晉人風致早年掛冠優遊泉石畫法吳仲圭三絕之亞擘成圖或售於人遂厚價返收之其自重如此

孫隆號都癡毘陵人開國忠憲侯孫生而穎敏有仙人風度寫翎毛草蟲自成一家號沒骨圖

張祐字天吉鳳陽人爵襲隆平侯爲人和易如儒者作梅花清氣逼人其從弟祿字天爵亦世其爵梅花有其兄之妙

王謙字牧之號冰壺道人以儒士隆平侯聘爲西席善書作爲梅花清奇可愛實天吉之師也子應奇作梅得家傳

陳憲章號如隱居士會稽人善畫梅與牧之齊名評者以二家雖格意不同憲章筆力實過牧之子英作梅

張緒字廷端海虞人屈處誠東吳人

右二人與仲昭同時工竹石亞於仲昭

毛良字舜臣號兩山居士爵襲南寧伯北平人寫山水師米元章雲霞出沒有天然之妙真賞鑒家尤工詩著無聲詩曲盡畫法之奧與詩集並行於世

太監陳喜字仲樂韃靼人工人物烏獸下筆無痕爲一代之妙

石銳字以明錢唐人畫得鄭子昭金碧山水界畫樓臺及人物皆傳色鮮明溫潤名著於時丁玉川江右人工人物山水

林良字以善廣東人歷陞錦衣指揮著色花果翎毛極精巧其放筆作水墨禽鳥樹木皆遒勁如草書人皆不及

顧宗字學淵五羊人任中書舍人畫學黃子久

姜立綱字廷憲號東谿永嘉人能文善書字畫楷正人得片紙爭以爲法畫學黃子久亦妙

黃璣字蘊龢柳楷字文範號萬竹山人俱永嘉人與廷憲官直內閣詩文書畫并皆佳妙

范遜字起東號葦齋東吳人蔣廷暉先生之壻工書法設帳授徒多所造就工於花竹翎毛人多尚之葉

文莊公嘗謂起東善花鳥有談論館閣名公多重之老於京師人稱范葦齋先生云

陳復字啓陽號坦坦居士燕山人幼同弟後從伯父任南京通政司右通政因與詩人文士交稔是以才思充溢詩文清奇尤長作畫山水松竹皆有矩度亦精寫照由儒士任鴻臚序班理禮部鑄印局事用

薦故國子典籍

陳後字啓先號寓齋復弟也詩文書畫與兄齊名尤精堪輿之學用薦任欽天監博士子漢繼其業焉

劉志壽字伯齡密縣人聰穎能詩以世業任南京欽天監五官靈臺郎喜寫翎毛尤長蝦蟹落筆瀟洒活動可愛

李景字光遠號柯耕衢之西安人工楷書授禮部司務善寫松竹有過庭章張廷端之筆意

杜堇字惺男有樺居古狂青霞亭之號鎮江丹徒人有籍於京師勤學經史及諸子集錄雖稗官小說罔不涉獵舉進士不第遂絕意進取爲文奇古詩精確通六書善繪事其山水人物草木鳥獸無不臻妙由其胸中高古自然神采活動宜乎宗之者衆

沈周字啓南號石田姑蘇人博學有奇思爲詩清新皆不經人道語字亦古拙學黃大癡法其善處略其

不善處，遂自名家。因求畫者衆，一手不能盡答，令子弟模寫以塞之，是以真筆少焉。

陶成，字孟學，號雲湖山人。寶應人。以宦家子中應天府鄉試，以試以事不果會試。天性落魄，然多才藝。書工篆隸真草，詩文奇古。畫山水多用青綠，尤喜作鈎勒竹，兔與鶴鹿皆妙。由其胸中洒然也。

蔣子成，江東人。工道釋神像。

阮福，海北人。道釋神像，亞於子成。

趙丹林，善作龍角鳳尾金錯刀竹。

過庭章，無錫人。妙於寫松。

林廣，廣陵人。山水人物學李在，得瀟洒活動之趣。

楊埙，字景和，善以彩色漆作屏風器物，極其精巧。皆以泥金題詩於上，由其能書畫也。

沈政，字以政，閩人。官至順天府丞，直仁智殿。工花竹翎毛。

徐柱，字夢節，東吳人。善寫葡萄。

伍概，字庭節，臨川人。工書，寄祿中書科。善花竹翎毛。

倪端，善工山水人物。

李福智，釋道人物，可繼上官伯達。

周全，工畫馬。

朱應祥，字岐鳳，號玉華外史。松江人。鄉貢進士。其志高尚，草書與東海南山並爲時重。寫竹尤奇。

俞泰字國昌號正齋無錫人宏治壬戌仕戶科都給事中寫山水絕類黃子久王叔明爲人溫雅詩文書畫皆似之

王田字舜耕山東濟南人以縣佐請老歸田村居喜爲樂府詞膾炙人口遠近傳播山水學高房山不失矩度與名達按與字當係衍文

何澄號竹鶴老人毘陵人善山水官至太守

道士彭元中沈明遠張復陽浙人畫法俱相似

張翬太倉人工山水

汪質字孟文金陵人工山水

許尚文金陵人工山水

盛行之江東人善畫梅花筆力蒼老萱葵竹菊形類草書

史廷直號癡翁復姓名爲徐端本江東名士性瑩瑩不羈以詩酒爲樂畫山水得行雲流水之趣

陳大章字明之號月隴鳳陽盱眙人由進士官至太僕少卿畫菊有雲湖之妙有詩名尤工行草

吳偉字士英更字次翁號小仙江夏人行取來京授錦衣百戶性自是不受羈絆放歸作山水落筆健壯

白描尤佳觀者自然起興同藝不及

呂紀字廷振四明人爲人謹厚山水人物俱工獨以翎毛得名其設色鮮麗生意藹然爲畫流所宗官至

錦衣指揮

鍾欽禮號南越山人又號一塵不到處善畫山水。

劉俊字廷偉山水人物俱能。

袁璘字廷器山水人物俱善。

張倫字秉彝人物專科尤善寫鬼判。

虞公諱謙號玉雪齋京口人永樂中官居都憲詩文政事爲羣公推讓公餘寫金錯刀竹多自題詩於上同里王性善精醫與公交厚善寫山水同時有郭將軍能詩工畫公贈詩有詩律清新畫入神之句其重之如此。

楊瑗當塗人爲儒學教諭善畫菜有生意。

程南雲號清軒大儒之後字備篆隸楷草詩文奇古官至太常寺卿喜作雪梅雪竹極妙。

朱孔易華亭人與清軒同官寫東里少師歸田圖評者謂其作家士氣皆具亦今之罕有者也。

黃蒙字養正永嘉人官至禮部郎中及其子采相繼以書法直內閣俱擅詩文山水得黃子久佳處蘇致中西蜀人由科第官署□山水師郭熙而清雅高出畫流。

葉澄字原靜其先吳人作畫學戴文進得其妙。

周臣字舜臣東吳人山水人物俱清致能詩。

唐寅字子畏東吳人中應天府鄉試第一才藝宏博作畫有古人之妙人罕及之圖書南京解元。文徵明姑蘇人寫竹得夏景之妙山水出沈周之右工詩文精書法吳越間稱之。

王彥字存拙。河陽人。善作梅花。

孔福禧先聖之裔。工山水。

孫天佑安國公之孫。翎毛蘭竹清致可愛。

張欽字士敬。祥符人。號震齋。善山水花竹。得古人之風。官至都閫。寧陽恭靖王懋之長子。

姜濟浮梁人。寓蜀。寫山水無墨痕。有雲烟出沒之奇。

僧照菴浙人。竹石學倪雲林。

僧曉菴東吳人。善畫葡萄。

僧日章蜀成都人。山水學唐子華。

僧草菴住嘉禾三塔寺。工詩畫。

王世昌號歷山。山東人。工山水人物。

王孟仁以字行。金陵人。小景山水人物。

朱銓字文衡。號樗仙。長沙人。工山水人物。鈎勒竹及菊兔亦能詩。

朱鑑字文藻。號墨壺。樗仙之弟也。山水人物清奇。

姜隱字周佐。山東黃縣人。善人物仕女。花果細潤工緻。得古人之妙。

杜君澤號小癡姑。蘇人。善楷書。工山水。嗜酒。流寓高郵。落魄不羈。以酒卒。

馬稷字舜舉。號醉狂。江東人。善山水人物。花木竹石。

李著字潛夫金陵人。工山水人物花木翎毛。

蔣三崧金陵人善畫山水。

朱端字克正欽賜一樵圖書人物山水學盛子昭墨竹師夏景善花木翎毛。

高松字守之號南崖子又號我山文安人其人甘守家貧有官不仕愛攻詩畫馳譽多能善書大字兼真草隸篆能繪小景并梅菊蘭松之如勾勒竹葡萄甚佳更有灰堆山墨竹尤長也。

張平山者名路字天馳大梁人也以庠生遊太學然竟不仕獨游情繪事其人物似吳偉而山水尤有戴文進風致一時縉紳咸嘉尚之得其真迹者如珙璧焉。名達按高松張平山二傳汲古閣本版缺而苗本有之茲據以錄。

續補

五代名達按涵芬樓藏汲古閣本僅存續補五代四字下文闕佚茲全據苗本抄補。

錢僕吳越文穆王傳瓘之養子官至秀州刺史精於畫藝。

宋

李交汀州人工畫猫。

任源字道源宣和間架閣紹興中復舊官善人物山水枯木怪石又作小景高宗愛之御題其上號真常子。

處士朱象先嘉泰間人號西湖隱士作人物山水橫塘野景以畫易酒日在醉鄉。

蘇晉卿漢臣子工佛像

徐明乃改之之子畫山水似其父。

金

楊邦基字德茂號息軒大定中進士畫人物兼馬尤善山水師李成官至祕書監禮部尚書。

# 題重刊圖繪寶鑑後

乾坤奠位聖人應世而興爻象分輝龍馬負圖而出清濁既含畫意淡濃自顯文章古往紛然今來亦爾。粵吾觀吳興文彥甫氏圖繪寶鑑之所萃者多方秀氣歷代清才或御筆以通神或仙機而運化但取雲林雪景豈拘繙服黃冠或稱山水人物之奇或著花竹禽魚之美或遺詩壇之逸興或抒官舍之閒情文武兼收君臣並列初題前序妍媸已別其區續綴後遺蒐選未臻其極今我朝大錦衣苗公字益之號巽齋者貴膺金玉雅愛丹青積集宋唐辯明真贗惜茲殘編敗缺嘗懷三豕之疑想彼舊版湮微永寢諸坊之售由是樂捐常俸禮致能書考正魯魚刻添麟鳳倘經一覽實勝千聞與夏氏共播芳聲資士林誰云小補正德己卯季夏望日賜宗師沙門虎林宗林志。

## 後記

圖繪寶鑑元刻本傳世甚少。涵芬樓藏兩明本，一爲正德己卯苗增刻，一爲汲古閣毛晉刻，以相比校，優劣互見，而皆不能無誤。苗本爲有續編之始，毛本亦有續編，可見毛本實出於苗本，其文字之有異同，蓋毛氏曾加校訂之功也。然苗本墨蹟模糊，缺文疊見，顯非初印，而文意不明，又較毛本爲甚。故此次翻印，參用兩本，間入己見，文字依據毛本，而隨文注明苗本異文於下。此缺彼備，彼無此有，皆攝取備者，以成完璧。蓋各有所長，不容偏取也。次序則補遺依苗本，列於卷五之後；續編之前，續補不依苗本，列於序目之間，亦不依毛本接於補遺之後。蓋前五卷與補遺係夏文彥原編，續編與續補係韓昂續撰也。名目則韓昂續編兩本皆列爲卷第六，今正其名爲續編，蓋前五卷爲夏文彥原書，不容接續爲編，毫無分別也。至於文義不明，兩本皆誤，一時無別本可校，間爲是正一二，終不能毫無遺憾云。中華民國十八年九月十九日姚名達識於涵芬樓。

